


Mark Ning Amije
Chongkahoi



First Purum Bible Translation

Mark Ning Amije Chongkahoi
First Purum Bible Translation

copyright © 2022 The Word for the World International and North East Centre for Training and Research

Language: (Purum)

Contributor: The Word for the World Southeast Asia

The Gospel of Mark in Purum

Published as

MARK NING AMIJE CHONGKAHOI

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-25

PDF generated using Haiola and XeLaTeX on 11 Mar 2026 from source files dated 25 Jun 2025
efbcb70a-f635-5fbf-b9f9-8da6299ec074

Contents

Mark	1
----------------	---

MARK Ning Amije Chongkahoi Chonglamsat

Mark dungjui a Chongkahoi hi <<Chongtep ther (NT)>> sunga akaom jedetrubu minli ngai karra Jesu Christa ringkho jarra minchuna amin mu inkhat kha e. Hiwa jedetrubu minli ngaihi <<Gospel>> tia akinjet, hiwa hi Chongkahoi tina e. Hiwa Chongkahoi minli ngaihi Jesu Christa thiso nuk a Matthew, Mark, Luke le John ning anmije e. Chongkahoi minli ngai karra Mark ning amije hi akabong tak inkhat e. Hiwa chongkahoi minli ngai karra amasatak a amije e tia taksenna anei, hiwa hi Jesu christa aneiso kunuk kum somruk le ranga (65) le kum somsari (70) wenna amije e. Akising akathei katamtak ning hiwa jedetrubu hi Roman Christian ngaikha mothoknasik a Rome ria anmije e tia taksenna anei. Mark hi, John Mark tia num akinjet, amahi Tirle Paul le Barnabas le ankinroi bunga sinkotho inkhat e, takkha Pathien chong kiril ansena (Missionary sinna) Paul le Barnabas kha alei juitor mak jarra ama riming kha aleiminthet (Sintho 13:13) Takkha nuk achu Barnabas le kinroi a anleise bung (Sintho 15:37-39) Mark hi Peter le ankinlopthei sap inkhat e tia taksenna anei (1 Peter 5:13) Mark ning Jesu ringkho ngaihi amit tak a akumu mikha a imak inum, Mark ning Peter ringkho katam tak amu ajet ngai kha amije e tia akising akathei ning taksenna anei hiwahi Mark dungjui a chongkahoi aleida e. Hiwa chongkahoi hin, Mark ning thiemroi ringkho le Jesu ning ahekna nikho kutung sik jarra minchuna ngaikha akatam amije e.

Asunga akaom Chong

1. Mark ning hiwa jedetrubu jarra malarna chong (1:1-13)
2. Jesu ning Galilee a aleiom lai aleitho

* **1:1** Manuscripts alak a chu *Pathien Sapatih* kinchal mak. **1:3** Is 40:3 † **1:4** *John nerdiram a ahong kinlar, baptized athole kinroi a Pathien chong aleiril.* Manuscripts alak a chu, *John Baptist kha nerdiram ma aleisuok, Pathien chong aleiril.* **1:6** 2 Ren 1:8

sin ngai jarra Mark ning kinchenna rilna anei (1:14--8:21)

3. Jesu ning Jerusalem asena jarra Mark ning rilna anei (8:22--10:52)
4. Mark ning atorna amije khachu, Jesu ning Jerusalem aomlai ama thina le ring nokna jarra (11:1--16:8)

John Baptist chongril

(*Mat 3:1-12; Lk 3:1-18; Jn 1:19-28*)

¹ Hiwahi Pathien Sapa Jesu Christa jarra Chongkahoi kha e.*

² Chongkachoipa Isaiah ning hi-ang hin aleimije:

<<Pathien ning aleiti, <Keining chongkaron ninma a kitir sik nin lampui akabol sik a.>

³ Nerdiram a mi inkhat ning a-ong a, <Puma sik a lampui kha bolturu; Ama asena lampui kha mintunru!> >>

⁴ Khawa soa John nerdiram a ahong kinlar, baptized athole kinroi a Pathien chong aleiril.† <<Ninsetna ria heikir inlang baptized thoru, khan Pathien ning ninsetna anarangai mindam pesik,>> tia mipuideng aleiti.

⁵ Judea ramsunga le Jerusalem khopui a kaom mipui katamtak John chongril karangai sik a anleisuok. Anmani ning ansetna ngai anleirilsuok, khan Jordan Tuidung a anmani ngaikha John ning baptized aleitho.

⁶ John ning satinkui mul a anbol ponder aleikei, akonga sawun kongkhit aleikhit, khan ama bak le in khachu khai le ramkhoining alei e.

⁷ Amaning mipuideng aleiminjet, <<Kei kunuk-a akahong sik miringpa khachu kei neknum akolok e, keichu ama kekokrui kinkunna kusutsik kutunga rohoi suokmang.

⁸ Keining nangni tui-a baptized kanatho, takkha amaning chu Ratha Kinthenga baptized anathosik e.>>

Jesu Baptize thona le mithemna

(*Mat 3:13--4:11; Lk 3:21,22; 4:1-13*)

⁹ Khawasoli sotlei a Galilee ramsunga kaom Nazareth ria Jesu aheiwa khan John ning Jordan Tuidung a baptized aleitho.

¹⁰ Jesu ning tui ria aheisuokli, amaning marwan akinlong le Ratha ning achunga wathu anga ahong chum kha aleimu.

¹¹ Khan marwan ria rasa inkhat ahonga, <<Nanghi kasapa mirit tak kha ni e. Nuchunga kumulung atai.>>

¹² Khawasoli Ratha ning amakha nerdiram a aleiminse,

¹³ Khawa munkhan nisom-minli a-om a, Seitan ning aleimathem. Ramsa ngainum khana anlei om, takkha marwan tirle ngaining anhonga ama anleisen.

Jesu ning ngakusur mi minli akoi
(Mat 4:12-22; Lk 4:14,15; 5:1-11)

¹⁴ John mikhumna sunga anda sonuk a, Jesu ning Galilee ase-a khan Pathien ria Chongkahoi ngaikha aleiril.

¹⁵ <<Apha kha ahongtungjei, khan Pathien Rengram kha anaijei! Ninsetna ria mulung thul inlang Chongkahoi kha taksen ru!>> amaning aleiti.

¹⁶ Jesu ning Galilee tuitham pangteng alonlai, amaning ngakusur miring inni, Simon le ama naipa Andrew, lenna nga ansur aleimu.

¹⁷ Jesu ning anmanideng aleiti, <<Heiwaru kunuk nujuiru, khan keining mi kusur kinimin chusik.>>

¹⁸ khawalai takkhan anlen ngai anda a anmani ngaikha amale kinroia anleise.

¹⁹ Khan amaning akalakdet aseli alop unai inni, Zebedee naite ngai, James le John aleimu. Anmani ning rukuong sunga anlen ngaikha wor thanasik anleibol.

²⁰ Khan Jesu ning anmani amuli, anmani kha aleikoi; khawa khan anmani ning anpa Zebedee le anlomroi ngaikha rukuong sunga anleida a Jesu nuk anleijui.

Ratha kathamak akulut mi inkhat
(Lk 4:31-37)

²¹ Jesu le ama thiemroi ngai Capernaum khopui a anheiwa, khan

aban Jehudi ngai Serni ning Jesu ning synagogue aseli aleiminchu.

²² Ama minchudan akajet mi rikip ning anleingak, ajarchu amakha Dan Oja ngaile leikin angmak, khawa nek a, amaning thotorna le kinroi a aleiminchu.

²³ Khawapha takkhan ratha kathamak kulut mi inkhat synagogue aheilutli aleikheek,

²⁴ <<Angmi keini denga numunom, Nazareth Jesu? Keini kimin mang sik hin naom mi? Keining nang kanajet, Nangchu akintheng Pathien chongkaron kha ni e!>>

²⁵ Jesu ning ratha deng chong ape, <<Omchenro, khan mipa deng ri heisuok ro!>>

²⁶ Ratha kathamak khaning mipa kha ranaktak a aleimin nok a, khan aong-akheekli mipa deng ria aheisuokjei.

²⁷ Mipui ngai ning anleingak, khawakhan anmani inkhatle inkhat ning ankinrakal, <<Hiwahi angmi? Hiwa minchuna hi athermi? Hiwa mipa hining ranak kaneitak a ratha kathamak ngaideng chongpena aleinei, khan anmani ning achong anleijui!>>

²⁸ Kha angkhan kinrem tak a Galilee ram pumpui a Jesu chong ngaihi alei kinthang.

Jesu ning mi katamtak amindam
(Mat 8:14-17; Lk 4:38-41)

²⁹ Khawasoli Jesu le ama thiemroi ngai, James le John kinroi a, synagogue anmathaanna khan Simon le Andrew ngai inteng anleise.

³⁰ Simon terpi kha ritun athoa phenchunga aleijal, Jesu aheitungli, khawanu chongkha amadeng anleiminjet.

³¹ Amaning khawanu deng ase a, akut ning akei dinga khan aleikeithei. Ritun ning khawanu kha amathanjei, khan numeisanu khaning anmani aleirajen.

³² Kini tasoa kholei ahongtung khan, mi ngaining akana le khori kulut rikip ngaikha Jesu deng anheiroi.

³³ Khawa khopui a kaom mipui rikip ngaikha khawa inma khan anleikinchn.

³⁴ Jesu ning ri-rai kana mikatamtak ngaikha aleimindam khan khori katamtak alei holsuok. Khori ngaining amakha atumi ti anleijet, khawa jarra amaning khori ngaikha ite leiminrilmak.

Galilee a Jesu chongril (Lk 4:42-44)

³⁵ Jingteng kini suokmak ma, Jesu athei-a inn kha aleimathaan jei. Khopui ria aheisuok a adai ngerna munkhan Pathien nina aleinei.

³⁶ Takkha Simon le akinroipui ngaining ansuok a amakha anlei entok,

³⁷ khan anmani ning ama anhong mu karkhan, amadeng anleiti, <<Mirikip ning nangkha ana entok.>>

³⁸ Takkha Jesu ning aleimasang, <<Hiwa khosir khopang ria einining inkhat teng nisesik. Kei ning anmanideng chong kirilsik, khawa sik jarra kei kahong e.>>

³⁹ Khawa jarra amaning Galilee ramrikip sunga aleise, synagogues a chong aleiril khan khori ngai alei holsuok.

Jesu ning mi amindam (Mat 8:1-4; Lk 5:12-16)

⁴⁰ Chi kaomtak kaphar ri koron mi inkhat Jesu deng ahonga, akinkunna, nasenro tia nina aleinei. <<Nangning nana nompe inchu, kei nimintheng ro,>>‡ amaning aleiti.

⁴¹ Jesu deng minreng kha aleisip,§ akut akadomma aleikotok. <<Keining konom jei, kintheng taro!>> tia aleiti.

⁴² Khawalai takkhan kaphar ri koron kha mipa deng ria asuok a, khan amakha adamjei.

⁴³ Khan Jesu ning chong kanger kha amadeng arilla amakha aleiminse,

⁴⁴ hi-ang hin amadeng ati sonuk, <<Rangairo, hiwahi atu deng khatnum rilmaro. Takkha thiempu deng wasero khan amaning nang na-en rase; khanchu mirikip deng nadamjei ti anjet nasik a, Moses chongpe dungjui a kinthoina kha hongtho ro.>>

⁴⁵ Takkha mipa kha asuok a amun rikip a akasuok chong ngai kha aleiril minthang, khawa jarra, Jesu kha kinlar a khopui khan leisuok tor mak jei. Khawa nek a, mun kadai-ngera aseli awa-om, tak amun rikip a kaom mipui ngaining ama kolla anheiwa.

2

Jesu ning alang kithipa amindam (Mat 9:1-8; Lk 5:17-26)

¹ Nikho alek soa Jesu ning Capernaum teng aleikirnok, khan inna khan ama aom jei ti chong alei kinthang.

² Khawa jarra mi katamtak anheiwa a khawakhan tungnasik mun korok leiommak, inkhar ma kutunga amun leirok mak. Jesu ning Pathien chongkha anmanideng aleiril lai

³ pasal minli ngaining, alang kithipa inkhat Jesu deng anhei kadomma anhongpha.

⁴ Mipui antam hei jarra, mipa kha ama kolla heilutpui tormuk. Khawa jarra anmani ning Jesu omna inchung khan anmin wenga mipa kha ajalna pher le kinroi a anhei makhai minchum.

⁵ Anmani ngaikha kha-angtuk taksenna kha alei mukar, Jesu ning alang kithi mipa deng aleiti, <<Kasapa, nisetna ngaikha kanarangai mindam sojei.>>

⁶ Khawa khan alei kin ong Dan oja alekning anbinga anleimindon,

⁷ <<Kho-ongmo amaning hi-anghin achong tor e? Hiwa hichu Pathien chung a arildek e! Pathien amabei e setna karangai mindam torchu!>>

⁸ Khawa laitak a Jesu ning anmani mulung mindon kha ajet a, anmanideng aleiti, <<Angsikmi khawa angkhan nin mindon e?

⁹ Alang kithi mipa deng, <Nisetna ngai kanarangai mindam pejei,> ti a-imakli, <Kinding inlang, napher kodom inlang, khan lonro, ti himo abeidet?>

¹⁰ Keining nangni deng niril minchenpe kate, Miring Sapa ning leithoichunga setna rangai mindam sik

‡ 1:39 Mat 4:23; 9:35 † 1:40 kei nimintheng ro: Hiwa kaphar ri koron hining miringpa hi amintheng mak e tia anlei. § 1:41 minreng; manuscripts alak a chu arang tia aom 1:44 Thm 14:1-32

ranak anei.>> khawa jarra amaning alang kithipa deng aleiti,

11 <<Keining nangdeng kiti, theiru, napher lei inlang, khan ni-inna setro!>>

12 Anmani ning an-inna an-omlai, mi pakha atheili, apher kha akadomma kinnot a mipui maikunga aleisuok. Anmani rikip ning anleingak a Pathien anleiminpak, <<Eini ning hiwa anghi lumungai phitmakmi!>> anleiti.

Jesu ning Levi akoi

(Mat 9:9-13; Lk 5:27-32)

13 Jesu ning woikhat Galilee tuitham pangteng ahong kirnok a. Mipui katamtak amadeng anheiwa, khan amaning anmani kha minchuna aleiphut jei.

14 Ama kha-ang khan asena, amaning ramsel karathai, Alphaeus sapa Levi ramsel telna inna aleikin ong kha aleimu. Jesu ning amadeng, <<Nujuiro,>> aleiti. Levi ning akinding a anak aleijui.

15 Khawa soa Jesu ning Levi inna bu aleibak.* Ramsel karathai katamtak ngaile setkoron ngaining Jesu nuk anleijui, khanna anmani katamtak ning amale athiemroi ngaikha bu anlei bakbung.

16 Dan Oja alek, Pharisees num aki e, Jesu ning ramsel karathai le setkoron ngaile bu anbak bungkha anleimu, khawa jarra ama thiemroi ngaideng anleirakal, <<Angsikmi amaning hiwa mi ngaile abakpui hi?>>

17 Jesu ning hiwa ajet a anmanideng aleimasang, <<Akadam ngaisik chu thiempu rangaimak, takkha akana ngaisik bei arangai. Keining kahong hichu mikidik ngai akakoi kahong imong, takkha setkoron ngai akakoi kahong e.>>

Bungei jarra chongrakal

(Mat 9:14-17; Lk 5:33-39)

18 Rei inkhat a John Baptist anak kujui ngai le Pharisees ngai ning bu anleingei. Mi alek ning Jesu deng anhonga anleirakal, <<John Baptist thiemroi ngaile Pharisees thiemroi ngaining bu an-gei a,

khan nang thiemroi ngaining angsik mi bu an-geimak e?>>

19 Jesu ning aleimasang, <<Moiroina akahong khomol ngaikha bu baklei ankir sik ninti mi? Kha imak! Moipa ning anmanile aomlai sengchu, anmani ning kha-ang thononung.

20 Takkha moipa kha anmanideng ria anroi sik nikho alahongsik e, khawa karkhan anmani bu anlangei sik e.>>

21 <<Atu inkhat ningnum pon kather awerkhat kha pon maro a kuthui delmuk, ajarchu pon kather awerkhat khaning pon maro kha akeirinna, akolok det a akinther sik.

22 Khanok chu atute ningnum sawun juhui muro a juther dangaimak, ajarchu ju khaning sawun juhui aminkoi sik, khan ju le sawun juhaikha akinmang sikjei. Khawa nek a, juther kha sawun juhaiter a thunsik e.>>

Jehudi serni jarra rakalna

(Mat 12:1-8; Lk 6:1-5)

23 Jesu ning Jehudi Serni kini khan sang billa aleise. Ama thiemroi ngai ning amale anheiwai, anmani ning sawui kha anlei richil.

24 Khawa jarra Pharisees ngaining Jesu deng anleiti, <<Enro, nang thiemroi ngai ning eini Dan le akintok mak Jehudi Serni ning antho hi!>>

25 Jesu ning aleimasang, <<Nangni paalei mo nin e David ning angmo aleitho baksik inkhat amanompha? Ama le ami ngaining anwon acham karra,

26 amaning Pathien inn alut a khan Pathien denga anpe waipol kha aleibak. Hiwahi Abiathar ning Thiempu Chungnung ahang laikhan aleisuok. Eini Senadan dungjui a hiwa waipol hichu thiempu beining anbak sik e tak David ning num aleibak, khan ama mi ngainum aleipe.>>

27 Khan Jesu ning atorna ati, <<Jehudi Serni kini hichu miring ngai thanasik a anbol e; miring ngaihi Jehudi Serning kini sik a abol imak.

28 Khawa jarra Miring Sapa hi Jehudi Serni kini ning sik num Puma e.>>

* **2:15** *Levi inna*; a-imakli *ama* (khawa kha, Jesu e) *inn*.

2:23 Dan 23:25

2:25 1 Sam 21:1-6

2:26 Thm 24:9

3

Kut kithi mipa inkhat
(*Mat 12:9-14; Lk 6:6-11*)

¹ Khan Jesu ning Synagogue aleikirnok, khawa khan akut kithi miring inkhat aleiom.

² Jesu ning akidikmak atho tia akitinom mi alek khawakhan anleiom; khawa jarra Jehudi Serni kini khan amaning mipa kha amindam sikmi tia akatha anlei ensui.

³ Jesu ning mipa deng aleiti, <<Hiwa amateng hin hongkalro.>>

⁴ Khan amaning mi ngaideng aleirakal, <<Jehudi Serni kini khan eini Senadan ning angmo tho atha ati e? Sansik mi a-imakli akathamak tho sikmi? Mi inkhat ringkho sansik a-imakli minmang sik mi?>>

Takkha anmanining ite leirilmuk.

⁵ Jesu ning amit alei kiwella anmanideng alei enna aleirang, tak anmani sik mulung leihoipui mak, ajarchu anmani mulung kanger le anthamak jarra aleipongpui. Khawasoli amaning mipa dengkhan aleiti, <<Nu kut keisoro.>> Amaning akut aheikeiso a, khan akutkha amasa anga aleidam.

⁶ Khawa jarra Pharisees ngaining Synagogue anmathaanna anleise khan Herod mi alek ngaile kinnot a ankinmu a, anmanining Jesu thatnasik sin anleikinthok.

Tuitham panga mipuingai

⁷ Jesu ning athiemroi ngaile Galilee tuitham teng anleise, khan mipui katamtak ning anak anleijui. Anmani ngaikha Galilee, Judea ria anleihong,

⁸ Jerusalem, Idumea, Jordan nisotenga, khan Tyre le Sidon khopui asir-apang ria anhong kinphut. Hiwa mirikip ngaihi Jesu deng anleihong ajarchu amaning atho ngaikha anleijet.

⁹ Mipui antamhei jarra ama an-uum maknasik Jesu ning athiemroi ngaideng rukuong inkhat amasik rathok ru aleiti.

¹⁰ Amaning mi katamtak aleimindam, khan akana rikip ning ama kotok nasik

anlei kin et-tarpui ama omnateng anlei nai.

¹¹ Khan Ratha kathamak kulut mirikip ning ama anmu karkhan, anmani ning amaikunga anleipur khan anlei-ong, <<Nangchu Pathien Sapa kha ni-e!>>

¹² Jesu ning ratha kathamak kulut anmani ngaideng ama atu mi tihi atu inkhat deng rilmuru tia chong kangertak aleipe.

Jesu ning tirle some-inni akadang
(*Mat 10:1-4; Lk 6:12-16*)

¹³ Khan Jesu ning chingmuol chungga akalla khan amaning amonom mi ngaikha aleikoi. Anmani ning amadeng anheiwu a,

¹⁴ Khan amaning some-inni ngaikha aleikadang, tirle tia aleipho. <<Kei le akaom sik a nangnihi kanakadang eji,>> amaning anmanideng aleiti. <<Keining nangni chongkiril sik a kunumuso sik,

¹⁵ Khan khori ngai holsuok nasik ranak ninnei sik.>>

¹⁶ Hiwa senghi amaning akadang some-inni ngaikha an e: Simon, Jesu ning Peter tia ariming apho;

¹⁷ James le anaipa John, Zebedee ngai naite, Jesu ning Boanerges tia ariming aleipho, hiwa tinachu <<Rokinri Mi>>

¹⁸ Andrew, Philip, Bartholomew, Matthew, Thomas, James Alphaeus sapa, Thaddaeus, khan Canan ria Simon,

¹⁹ Khan mi khutchunga akapesuok sikpa Judas Iscariot, hiwa ngaihi an e.

Jesu le Beelzebul

(*Mat 12:22-32; Lk 11:14-23; 12:10*)

²⁰ Khan Jesu inn teng aleise. Mipui akatamtak anhong kinchun nok a Jesu le athiemroi ngaikha bubak nasik pha leinei muk.

²¹ Ama insung mi ngaining hiwa chong anjetkarra, anmani ning amakha roisuok nasik anleitho, ajarchu mipui ning aleiti, <<Amahi akinwetjei!>>

²² Jerusalem teng ria akahong Dan Oja alek ngaining anleiti, <<Ama sunga Beelzebul aom! Anmani holsuok nasik amadeng ranak akape kha khori ngai lukakeipa e.>>

²³ Khawa jarra Jesu ning anmani ngaikha akolla akoi-a khan anmanideng chongtekak ngaikha aleirilpe: <<Seitan ning kho-ongmo seitan aholsuok tor sik?

²⁴ Rengram inkhat ning ankin khoithenna rupni ansuokli inkhatle inkhat ankingsol inchu, khawa rengram kha akoisik e.

²⁵ Insung inkhat akin khoithenna rupni ansuokli inkhatle inkhat ankingsol inchu, khawa insung kha akoisik e.

²⁶ Khawa jarra Seitan rengram hi rupni suok a ankin khoithen inchu, khawakha sotno ning, takkha koi ata ahekna amang ripsik e.

²⁷ <<Tu inkhat ningnum akarat mipakha ankhit masa a adamak inchu; a-inna lutli neinak rikip kha khektor nonung. Kha inchu mipa kha ankhit masa inchu neinak kha ankhektor sik.

²⁸ <<Akidik a keining nangnideng kiti hi e, khachu mi ngai setna le akathamak rikip anril angjet aleiom inum rangaimindam pesik e.*

²⁹ Takkha atu inum Ratha Kintheng chungga akirildek ngaikha angtikkar inum rangaimindam penoning, ajarchu amaning kumleiko setna athojei.>>

³⁰ <<Ama sunga ratha kathamak kha aom>> mi alek ning anti jarra, Jesu ning hiwahi aleiti.

Jesu anu le anaingai (Mat 12:46-50; Lk 8:19-21)

³¹ Khan Jesu anu le anaingai anhongtung. Anmani ning inn tolla anngirra khan ama kinmu pui sik a chong anlei muso.

³² Jesu akolla mipui katamtak anlei kin ong, khan anmani ning amadeng anleiti, <<Enro, nunu le nu-u nanai, naser ngaining tolla nang ana kinmu puinom a an om.>>

³³ Jesu ning aleimasang, <<Atumi kei kunu? Atumi kei ku-u kanai ngai?>>

³⁴ Ama akolla akin-ong mipui ngaikha ahei enna aleiti, <<Enru! Hinna akaom ngaihi kei kunu le ku-u kanai ngaikha an e!

³⁵ Atu-tu inum Pathien lungdo kutho ngaikha ku-u, kanai, kunu le kaser ngaikha an e.>>

4

Muchi kaworpa chongtekak (Mat 13:1-9; Lk 8:4-8)

¹ Jesu ning Galilee tuitham panga minchuna aleiphut nok. Ama akolla anhong kinchun mipui ngaikha antam hei jarra amaning rukuong sunga alut a alei kin ong. Rukuong kha tuichung a aleiom, khan mipui ngaining tuipanga anleikintup.

² Amaning chongtekak ngai aneiman a anmanideng chong katamtak aleiminchu, khan anmanideng aleiti:

³ <<Rangairu! Phakhat a mipa ning muchiru kaworsik a aleisuok.

⁴ Amaning lei a muchiru kha aheiworakar, alek ning lampui sirra ata, khan wa ngaining anhonga a anleibak.

⁵ Alek ning lungkarra leipil tomna khan aleita. Muchiru kha kinranga ahongmong, ajarchu leipil kha lei kinthuk mak.

⁶ Khan, kini ahongsuok karra, muchikek ngaikha akinwoi a aleicharjei; ajarchu anrujung kha akinthuk a alutmak jarra.

⁷ Muchiru alekning riling-bil karra aleita, anhongmong takkha riling ning aleidiip a, kara leineimuk.

⁸ Takkha muchiru alekchu leipil thana-a aleita, muchiru ngaikha anhongkek a, anhong kin-son khan kara anhongnei, alekning somthum, somruk, khan alekning reijakhat anhongkinra.>>

⁹ Khan Jesu ning atorna aleiti, <<Kour ninnei inchu hiwahi rangai ru!>>

Chongtekak ngai ajar (Mat 13:10-17; Lk 8:9,10)

¹⁰ Jesu kha abinga aleiom lai, achong leikajet alek ngaile athiemroi some-inni ngai amadeng anheiwa khan Chongtekak ngaikha kinchenna rilchen nasik amadeng anleirakal.

* **3:28** akathamak rikip anril angjet aleiom inum; a-imakli Pathien chungga akathamak akiril ngaikha **3:29** Lk 12:10 **4:1** Lk 5:1-3

¹¹ Jesu ning aleimasang, <<Pathien Rengram jarra akin-iip ngaikha anape jei.>> Takkha tu inum tolla kaom milak ngaisik chu, chongtekak hining hiwa rikip ngaihi anjetsik,

¹² khawa jarra,

<< <Anmanining enchu an-en sik, takkha munonung;
anmanining rangaichu anrangai sik, takkha jetnonung.

Kha-ang antho inchu, anmani ning Pathien deng anheikir noksik, khan amaning anmani ngaikha arangai mindamsik.> >>

Jesu ning muchi kaworpa chongtekak aril minchen
(Mat 13:18-23; Lk 8:11-15)

¹³ Khan Jesu ning anmanideng aleirakal, <<Hiwa chongtekak hi nangni ning jetlei mo nin e? Kha inchu, nangni ning alak chongtekak ngai kho-ongmo ninjet torsik?

¹⁴ Muchi kaworpa ning Pathien chongkha awor.

¹⁵ Miring alek khachu lampui-sir a akata muchi ngaikhale akin-ang; anmani ning khawa chongkha kinranga anjetli, Seitan khan aheiwali amulung sunga kaom chongkha akhekjei.

¹⁶ Miring alek ngaining lungkarra akata muchi khale akin-ang. Anmani ning khawa chongkha kinranga anjetli, rokpu tak a anleiralang.

¹⁷ Takkha anmani mulung kinthuk a leilutmak, ajarchu anmani akasot a leidei tormuk. Khawa chong jarra khan, pongna a-imakli minpongna aheiwakar khanchu, anmani ning kinremma anmoso.

¹⁸ Miring alek ngaikha riling bil karra akata muchi khale akin ang. Anmani ngaihi chong kajetjei ngaikha an-e,

¹⁹ takkha hiwa ringkho sik a mulung pongna, neile hoi kumunom, khan alalak munomna rikip ngaikha ahonglut a, khawa chongkha anminmang, khan anmani ning kara neimuk.

²⁰ Takkha miring alek khachu leithoi thana munna anwor muchi khale ankin-ang. Anmani ning chongkha anrangai, anleiralang, khan kara annei: alekning somthum, somruk, khan alekning reijakhat akara.>>

Taidon thoia thangmei
(Lk 8:16-18)

²¹ Jesu ning arilminjom, <<Tu inkhat ning thangmei aheichoi a Taidon thoia a-imakli phenchung thoi a anda ngaimi? Thangmei mutungna chung a anda-ngai ileimi?

²² Alei kinthup ngaikha alahong kinlar sik e, khan alei kinkhu rikip ngaikha ala kinlong sik e.

²³ Kuor kanei ning hiwahi rangairu!>>

²⁴ Amaning anmanideng aleiti, <<Nangni ninjet ngaikhan kinsing theiru! Nangni ning mi ngai chung a chong nintan ang a nangni dengnum Pathien ning atansik e, takkha akikheldet sik e.

²⁵ Alek akanei ngaikha khella akinpe sik, khan akanei phitmak ngaikha ama anei alekkha akinkhek del sik e.>>

Aheikomong muchi tekak

²⁶ Jesu ning aleirilnok, <<Pathien Rengram khachu hi-ang e, mipa inkhat ning ama leipuk a muchiru awor khale akin-ang.

²⁷ Amaning jaanna ajal, suun eli athei sik, khan khawa awor muchiru ngaikha anheikek a anheimong. Kha inum amaning kho-ongmo aheimonga aheikhang e ti leijetmak.

²⁸ Leipil khaning muchikek ngaikha aminmong khan anheikara; amasatak adon anheisuok, khanchu aheiper, khan atorna a sawui katha kha akara.

²⁹ Sang kha aminkara, mipa ning koite ning sang ka-at aleiphut, ajarchu sang-at phakha aheitungjei.>>

Ancham ru chongtekak
(Mat 13:31,32,34; Lk 13:18,19)

³⁰ Jesu ning aleirakal, <<Pathien Rengram hi anglemo akin-ang niti sik? Eini ning ang chongtekak mo nineiman li niril minchen sik e?

³¹ Khawa khachu, Mipa khaning leithoichunga anchamru akisintak aru achoi a, khan leipilla awor khale akin-ang.

³² Apha alek so a ahongkomong anser-leina ngai karra akaloktak inkhat ahongchang. Khan abaak kolok ngai ahongsuok a khawa khan wa ngaining anrubu anleisak.>>

³³ Jesu ning ama chongkha mi ngaideng aleiril, hiwa anga chongtekak katamtak ngaihi aneimanna; amaning anmani anjettor laiseng aleirilpe.

³⁴ Amaning chongtekak kinchallei a anmanideng ite inkhat num leirilpe mak, takkha ama thiemroi ngaile bei an om karkhan, amaning kinchenna angrikip ngaikha anmanideng aleirilpe.

Jesu ning phaiwopui amindai
(Mat 8:23-27; Lk 8:22-25)

³⁵ Khawa nitak kholeiteng khan Jesu ning athiemroi ngaideng aleiti, <<Eini tuitham ralkhat teng kai inlang se rangri.>>

³⁶ Khawa jarra anmani ning mipui ngaikha aleimathan; athiemroi ngaining Jesu alei chuongna rukuong khan anlut a, khan anmani ning amakha anleiroi. Rukuong aleknum khawa munkhan aleiom.

³⁷ Jetlei theilei a phaiwo pui karat inkhat ahongranga, tui akinnok khan rukuong pangkha ahong jemman tuikulut aleiphut, rukuong kha tuining hongsip sik aleitho.

³⁸ Jesu ning rukuong nukteng khan, montum aneia aleijal. Athiemroi ngaining ama ankeithei a anleiti, <<Oja, keini thisik kintije naddonlei sikmo ni-e?>>

³⁹ Jesu ning angir a phaiwo dengkhan chong aleipe, <<Omchenro!>> khan amaning tuikinnok dengkhan aleiti, <<Kinnok maro!>> phaiwo kha rangmak jei, khan arikip ahongdaijei.

⁴⁰ Khan Jesu ning athiemroi ngaideng aleiti, <<Angsikmi kha-angtuk ninchi e? Tunkutung nangni taksenna ninlaneimak e?>>

⁴¹ Takkha anmani ning anchi hei a inkhatle inkhat deng anlei-kinril, <<Hiwa

mipa hi atumi? Phaiwo le tuikinnok ningnum amachong anjui hi!>>

5

Jesu ning Ratha kathamak kulutpa amindam
(Mat 8:28-34; Lk 8:26-39)

¹ Jesu le ama thiemroi ngai Galilee tuitham ralkhat teng, Gerasa ramkol teng anwatung je.

² Jesu rukuong ria kinrangtak a ahei suoklimli, thaan khur ria ahei kosuok pasal inkhat ning ama alei kintong pui. Hiwa mipa hi asunga ratha kathamak aleikoron a e,

³ khan thaanna alei kaom e. Tute ningnum thirrui khit a anda tormak je alei e;

⁴ ake le akut thirrui a anlei khitchak, tak apha rikip a thirrui kha a phoi chet a thir khaning ake alei rachak. Ama ranak aleirat rangra khana tu tening num leikhap tormuk.

⁵ Sun le jan thaan le chingmoul kutung alonna, aleikheek a khan abinga lungning aleikin-at.

⁶ Amaning akalakdet a-om lai Jesu kha aleimu; khanchu alei taanna, amai kunga kemorkhup atep a aleikinkun,

⁷ khana aleikheek a, <<Jesu, Akin Sangtak Pathien Sapa! Kei angmo nulo rong niti e? Pathien jarra, kinini e, kei nimin pong moro!>> ati.

⁸ Amaning hi ati ajarchu Jesu ning aleiti, <<Ratha kathamak, hiwa mipa ria heisuokro!>>

⁹ Khawa jarra Jesu ning amadeng aleirakal, <<Niriming angmi?>>

Mipa ning aleimasang, <<Kei kiriming, <Akata> ajarchu keini kintam!>>

¹⁰ Khan khawa ram ria ratha kathamak ngaikha aholsuok mak nasik amaning Jesu deng akin ni a aleiom.

¹¹ Khawa kolla khan wok katamtak rup inkhat khawa chingkolla khan bu anbak a aleiom.

¹² Khawa jarra ratha kathamak ngai khan Jesu deng anleini, <<Wok ngai deng son numoso ro, asunga lutkinte,>>

¹³ Amaning aminse jei, ratha kathamak ngai kha mipa deng ria ansuok a wok

ngai sunga anhong lut je. Wok ngaikha akin chuna lising inni kopo an e, korolkham ankin chom thak a tuitham sunga anlut rip jei.

¹⁴ Wok kakhal ngai kha antaan a khopui sunga le akho khoa anwaril minthang jei. Mipui ngaikha omchen akosuok aka-en sik anheiwa.

¹⁵ Khana anmani ning Jesu deng anhong karra, akatam khori koronpa kha anleimu. Ama khana khan alei kin ong, pon akinsilla akilim senga aleiom; khan anmani rikip ning anlei chi.

¹⁶ Khori kulutpa le wok ngai chung a kosuok omchen aleikumu ngaining mipui ngaideng anleiril pe.

¹⁷ Khawa jarra anmani ning Jesu deng anram moso nasik a anleiti.

¹⁸ Jesu ning rukuong sunga alutlai, khori koronpa khaning, <<Nangle sebung ri!>> tia aleikinni.

¹⁹ Takkha Jesu ning leinom pe mak. Khawa nek a amaning aleiti, <<Nang na-inna kir-inlang na-insung mi ngaideng angtuk a Puma ning nangsik a anathope le anaminreng kha waminjet ro.>>

²⁰ Khawa jarra mipa kha Decapolis (tinachu Khopui som) kutungbit aleise, Jesu ning amasik angtuk a mo athope e ti kha awaril je. Khan akajet rikip ngaining anleingak.

Jairus sanu le Jesu aponmor kotoknu (Mat 9:18-26; Lk 8:40-56)

²¹ Jesu tuitham ralkhat teng rukuong a akirnok. Khawa tuitham kolla khan mipui katamtak akolla ankintup je.

²² Jairus, khawa kho synagogue sik a sin koronpa, ahongtunga, khan Jesu amu a akekunga abinga ahongkinbok,

²³ Khan mulung kuluttak a aleikinni, <<Kasanu kisin ranak tak a ana je. Minreng tak a hong inlang adam nasik le aring nasik achunga nukut nawada pero!>> aleiti.

²⁴ Khan Jesu ama le kinroi a ase a, khan mi katamtak Jesu le kinroi a mipuining amakha anuk-ama ankin et-tarpui je.

²⁵ Khawa khan kum somle inni thi akosuok khodeng kathei tak numeisa inkhat aleiom,

²⁶ mika en thiempu katamtak ning anlei en rawang leidam mak. Asumsan nei rikip aleineiman so je, tak akana adampui nek a apha rikip a akintet det je.

²⁷ Khawanu ning Jesu chungchanga aleijet, khawa jarra mipui karra ahonga anukteng ahei jui,

²⁸ abinga alei kinti, <<Aponmor bei inum kokotok tor inchu damna kanei sik.>>

²⁹ Khawanu ning aponmor alei kotok a, athi kosuok kha khawa phatak a abang je; khana akana kha adamjei tikha abinga mulung sunga akinjet.

³⁰ Khawa laitak khan Jesu ning ama ria aranak akosuok kha aleijet je, khawa jarra amaning mipui ngaideng ahei kinhei a a-enna aleirakal, <<Atu ningmo kopon akotok e?>>

³¹ Ama thiemroi ngaining anheimasanga, <<Mipui hiseng hining ana-umtur numu; angsik a mo nangdeng anukotok kha nana rakal e?>>

³² Takkha Jesu ning khawa akotok mikha amu nasik asir-apang alei en.

³³ Numeinu achunga omchen kosuok kha akin jet a, achi pumma ahonga, ake kunga akinkunna, akidik rikip kha amadeng awaril je.

³⁴ Jesu ning khawanu deng aleiti, <<Kasanu, nataksenna khaning animindam eje. Akahoi-akadai a setro, napongna ria dam rang ro.>>

³⁵ Jesu ning hi arillai, Jairus inn ria chongkoron mi alek ahonga amadeng anlei ti, <<Nasanu kha athije, Oja kha angsik mo niminpong sik e?>>

³⁶ Angmi anmanining anleitikha Jesu ning leirangai pemak,* takkha lamkakeipa deng aleiti, <<Chimaro, taksen bei taksen ro.>>

³⁷ Khan amaning Peter, Jame khan anaipa John ilei a tute anuk leimin juimak.

³⁸ Anmani ning Jairus inn anheitung je, khanna khan mingai kinhangna le chap ong rasa rikip Jesu ning aleijet.

³⁹ Insung alut a anmanideng aleiti, <<Angsik mo ankin hang e? Angsik mo

* 5:36 ite leirangai pemak

ninchap e? Naipangnu hi akithi imak, akajal e!>>

⁴⁰ Anmani ning anlei munuipei, khawa jarra amaning anmani rikip tolla aleiminsuok, naipangnu anu le apa khan athiemroi inthum ngai aroi a naipangnu jalna den sunga anlut je.

⁴¹ Amaning naipangnu akut ama-o a aleiti, <<Talitha, Koum,>> hiwa tina chu, <<Naipangnu, keining thei ro kiti!>>

⁴² Khawa laitak khan naipangnu kha akinding a aleilon jel. Naipangnu kha kum some-inni a ije. Khawa omchen asuoklai khan, anmani ning anleingak.

⁴³ Takkha Jesu ning atukhat dengnum rilmaknasik tia anmanideng chong kharna aleinei, khan Jesu ning aleiti <<Naipangnu kha baksik angmikhat peru.>>

6

Jesu kha Nazareth a leidonmuk
(Mat 13:53-58; Lk 4:16-30)

¹ Jesu ning khawa munkha amathanli ama khopui teng aleikir je, ama thiemroi ngai num anlei jui.

² Jehudi Serni kinining synagogue a minchuna aleiphut jei. Mikatam tak khana khan anlei om, achong kha anjet a anmani rikip ning kinlak ansak rip je. <<Hiwa ngaihi khonarimo apha e? Ang singna mi amadeng akin pehi? Kho-ong mi sinkinlak ngai athotor hi?

³ Amahi thingsin kothopa, Mary sapa, James, Joseph, Judas, khan Simon ngai ulenai kha elei mi? Anainu ngai hin an-om elei mi?>> khanchu anmani ning ama leidon muk je.

⁴ Jesu ning anmanideng aleiti, <<Pathien chongkachoi ngaihi, akhosung le a-insung, khan ulenai elei a, mun rikip achu kajana anei e.>>

⁵ Khawa munnakhan amaning akadama mak alek chungga akut ada a amindam elei a, sinkinlak ite leitho tormak.

⁶ Mipui ning taksenna anleineimak jarra, Jesu ning aleingak.

Jesu ning thiemroi some inni amuso
(Mat 10:5-15; Lk 9:1-6)

Khawasoli Jesu ning ase a asir apanga kaom kho ngaideng aleiminchu.

⁷ Amaning thiemroi some-inni ngai kha akoitup a khan mi ini-ini-a aleimoso. Ratha kathamak ngai chungga thotorna ratha aleipe,

⁸ khan chong aleipe, <<Ninlam nin se na khengrol elei a neinak inkhat te ron dal muru, waipol, paitu, sumsankok a sumsan, choi muru.

⁹ Keto chuongru, tak songkol akikhel choi muru.>>

¹⁰ Amaning anmanideng arilnok a, <<Mingai ning analeidonna mun nakhan, amun kha nada mak laiseng khawa inna khan omru.

¹¹ Khopui inkhat a nahong lut karkhan mi ngai ning analeidon mak a-imakli nachong an rangaimak inchu, khawa mun kha leidaru khanna ninkepha ruhut leikithing thak ru. Khawa kha anmani sik mulungkoina achang sik!>>

¹² Khawa soli anmani ning anleisuok a mingai kha ansetna ria mulung thulnasik chong anleiril.

¹³ Anmani ning khori katamtak holsuokna anleinei, khan akana mi katamtak ngai chungga Olive sarek akonot a anmindam jei.

John Baptist thina
(Mat 14:1-12; Lk 9:7-9)

¹⁴ Tunchu Reng Herod* ning angrikip chungchanga ajet je, ajarchu Jesu riming athana kha mun rikip a alei kinthang je. Mi alek ning anleiti, <<John Baptist thina ria ahong ringnok je! Khawa jarra hi-ang sinkinlak thonasik ranak hi anei e.>>

¹⁵ Achang rawang alek ning anleiti, <<Amahi Elijah e.>>

Alek ning anleiti, <<Amahi atenlai aleikaom Pathien chongkachoi anga Pathien chongkachoi inkhat ang e.>>

¹⁶ Herod ning hiwo ajet a, amaning aleiti, <<Amahi John Baptist e! Keining alu kalei tan e je, tak ahong ringnok je!>>

17 Herod atakning John surna sik chong aleimoso, khan thir rui ning aleikhit a khan mikhumna sunga aleida. Herod ning hi-ang aleitho hi anaipa Philip numei amaning alei kusut a alei ompui hi, Herodias jarra e.

18 John Baptist ning Herod deng hi-ang aril pe chak, <<Nanaipa numei na-ompui sik hi nangsik akidik imak!>>

19 Khawa jarra Herodias ning John kha lei-en nommak khana that sik a aleimindon, tak Herod a-om jarra leitho tormak.

20 Herod ning John kha aleichi ajarchu John kha mi katha le akintheng e ti aleijet. Herod ning John chongril arangai phakkan mulung aleipong inum ama chongril kha aleirangainom, khawa jarra amakha akathatak a aleida.

21 Atorna Herodias ning apha kathatak aleimu je. Khawakha Herod aneining nikho e, khawa ning amaning ram waikaron akolok rikip, raal lamkakei, khan Galilee ram kakei ngai bak minchunna athopui na pha kha e.

22 Herodias † sanu aheilut a ahong laam, khan Herod le khomol ngaiseng kha anmulung aleimintai. Khawa jarra rengpa ning numeisanu deng aleiti, <<Angmi nangning nomonom? Kei ning nang nomonom rikip kanape sik.>>

23 Khan amaning kintepna katamtak le akinhakserra aleiti, <<Nangning ninini rikip kei ning kanapesik, karengam aherkhat inum!>>

24 Khawa jarra numeisanu ning asuok a anudeng aleirakal, <<Angmi keining kini sik?>>

Anuning aleimasang, <<John Baptist lu.>>

25 Numeisanu kha kinnot a aheikirra rengpa deng ahongni, <<Kei ning hiwa mun takhin khan atunhin John Baptist lu kha kheeng chung a nanape sik komonom!>>

26 Hiwa hin Rengpa amulung apong je, tak ama khomol ngai maikunga alei kintep jarra khan numeisanu nina kha nang leititor mak je.

27 Khan rengpa ning akangaak raalmi inkhat khawa laitak khan John lu heichoi sik a chong aleipe a aleitir je. Akangaak pa kha mikhumna a ahong se-a, khan John lu kha ahong tenjei;

28 Khan kheeng inkhat chung a lu kha aheichoi minlut a numeisanu deng aleipe, amanu ning khawakha anudeng aleipe je.

29 John thiemroi ngaining khawa chongkha anjetli, anmani anhonga khan akulong kha anlei-a khan thaana anwaphum je.

Jesu ning mipui katamtak awai (Mat 14:13-21; Lk 9:10-17; Jn 6:1-14)

30 Tirle ngai kha anhong kirra khan Jesu le anlei kinmu, khan ansintho rikip le mi anlei minchu ngaikha amadeng anlei ril.

31 Khawakhan mi akase le akahong mikatam tak anlei-om jarra Jesu le athiemroi ngai bu baksik apha num leimutor muk. Khawa jarra Jesu ning anmanideng aleiti, <<Eini nibinga ni-om thei nasik munna se inlang pong hongminchum rangri.>>

32 Khawa jarra mun daina inkhat a anmani bei rukuong anchuong a anleise je.

33 Achang rawang anmani anse kha mi katamtak ning anmu a khan anmani an e tikha anleijet; khawa jarra khopui rikip a mi anhong suok a khan antaan a Jesu le athiemroi ngai makma amun kha anleitung masa je.

34 Jesu ning rukuong ria aheisuok pha, mipui katamtak ngaikha aleimu, khan anmani sik a amulung kha minrengna asip je, ajarchu anmani ngaikha keelmong kakhal kinchal lei keelmong anlei ang je. Khawa jarra amaning chong katamtak aminchu aphut je.

35 Khan kholei aheitung phakkan, athiemroi ngai anhonga amadeng anleiti, <<Tunchu apha hi ommak je, khan amun hi mi daina mun e.

† 6:22 Herodias sanu; manuscripts alek achu *Ama sanu Herodias*.

6:34 Tel 27:17; 1 Ren 22:17; 2 Kha 18:16; Eze 34:5; Mat 9:36

³⁶ Mipui ngai hi minse inlang, anmani ning anaina khosung a-imakli ruhonna se inlang anbak nasik kinrocho rusu.>>

³⁷ Jesu ning aleimasang, <<Nangni ning anmanideng angmikhat baknasik peru.>>

Anmani ning anleirakal, <<Keinining kinseli sumsan‡ reini ning waipol kinrachopeli anmani kinminbak sik hi nangning numunom mi?>>

³⁸ Khawa jarra Jesu ning anmanideng aleirakal, <<Waipol angjet mo ninnei e? Se inlang hong en ru.>>

Anmani ning anhong entok a, <<Waipol ranga khanchu nga inni,>> tia anlei minjet.

³⁹ Khan Jesu ning athiemroi ngaideng mipui ngai kha arup-rup a khoithen nasik le aka-em sachik chung a min-ong nasik aleiminjet.

⁴⁰ Khawa jarra mipui ngaikha reikhat rup khan somranga rup mintaang a ankin-ong je.

⁴¹ Khan Jesu ning waipol ranga le nga inni kha alei a, marwan teng a-inna, khan Pathien aminpak. Waipol kha aher akhoi a khan mingai deng semnasik athiemroi ngaideng ape je. Amaning nga inni khanum anmani rikip deng asem pe je.

⁴² Mi rikip ning anbak a khan anlei khoprip.

⁴³ Khawa soa athiemroi ngaining mingai bak akinlek waipol le nga kha taidon somle inni akisip mer an rut.

⁴⁴ Khawaning Awai minkhop pasal seng ngaikha lising ranga an e.

Jesu tui chung a alon (Mat 14:22-33; Jn 6:15-21)

⁴⁵ Amaning mipui ngai minse sik atilai, kinranga Jesu ning athiemroi ngaikha rukuong a aminlut a tuitham ralkhat, Bethsaida khopui ama modondet a aleiminse.

⁴⁶ Jesu ning mingai akinthen pui soli, amaning chingmuolla Pathien nina aleise.

⁴⁷ Kholeiteng ahong tunga, Jesu tuitham panga abinga alei omlai khan rukuong khachu tuitham lai a aleiom.

⁴⁸ Amaning athiemroi ngai pongna kha aleimu, ajarchu phaiwo karang karat kha anlei kintongpui; kha-ang khan jingteng pung inthum le pung kuruk karra Jesu ning tui chung a anmanideng aheiwa a amaning anmanikha aheikhel deng karkhan,§

⁴⁹ Amaning tui chung a ahonglon kha anmukar khan, <<Hiwa hichu raikho e!>> antia anleikheek.

⁵⁰ Anmani ning anleimu karkhan anmani rikip anleikinlai.

Khawa laitak khan Jesu ning anmanideng aleiti, <<Kin-ngam na nei ru! Chimuru, Kei ki e!>>

⁵¹ Khan amaning anmani rukuong sunga aleilit, khan phaiwo kha aleibang jei. Khan athiemroi ngaining anleingak ranga,

⁵² ajarchu anmani ning mipui lising ranga awaikha ajar leijet muk; anmulung ning khawa kha leisur tormuk.

Jesu ning Gennesaret a mikana amindam (Mat 14:34-36)

⁵³ Anmani ning tuitham anleirakaan a Gennesaret ramteng anheiwa, khanna khan rukuong kha tuitham panga anleikhit.

⁵⁴ Anmani ning rukuong anleida solimli, mi ngaining Jesu kha anleijet kalen.

⁵⁵ Khan khawa ram mipui ngaining anleijet karkhan khawa munteng anheitaanna anheiwa; khan khonna a-e inum ama aom ti anjet inchu, akana ngai amadeng anheiroi a apher chung a anleiminjal.

⁵⁶ Jesu sena mun rikip, kho, khopui, ruhon kutung achanga, mingai ning akana ngaikha keithel munna anheiroi a apon morbei inum mintok nasik anleini. Khan khawa pon mor aleikotok rikip ngaikha anleidam.

7

Pirui Pirui minchuna (Mat 15:1-9)

¹ Jerusalem ria akahong Pharisees le Dan Oja alek Jesu kolla anhong kintup.

‡ 6:37 sumsan: hiwo sumsan hichu nikho inkhatta ratha man e (Mat 20:2 anri) § 6:48 anmanikha aheikhel karkhan; anmani le kinchuna.

² Ama thiemroi alek ning ankut soplei a bu anleibak kha anmani ning anleimu, hiwahi anmani senadan dungjui a akinthengmak e, tichu anmani ning ankut kha Pharisees ngaining mipuideng anminchu anga leithomuk.

³ (Ajarchu Pharisees le Jehudi rikip ning pi le pu ngai leiminchu senadan anleijui: ankut kha akatha ansopmak laiseng anmani ning leibak muk;

⁴ khanchu keithel ria anheichoi neinak ngaikha amasa ansop mintheng mak laiseng leibak muk.* Khale kinroi a anmani ning alak senadan akatam anleijui, tichu hai, bel, sumbel khan phenchung ngaihi anlei sop mintheng.†)

⁵ Khawa jarra Pharisees ngai le Dan Oja ngai ning Jesu deng anleirakal, <<Angsik jarrami nang thiemroi ngai ning eini pi le pu khanga anleida minchuna anleijui mak, takkha khawa nek a kut achok pumma anleibak?>>

⁶ Jesu ning anmanideng aleimasang, <<Isaiah chongsaan kha kho-ongtuk akidikmi nangni jarra! Nangni akatha kinlem nin e, tia hi-anghin aleimije: <Hiwa mingai hining anmur bei ning anakaja, Pathien ning ati, Tak anmulung chu kei ria akalaak a an-om.

⁷ Kei anukumuk hinum anmani sik anemna ommak, Ajarchu anmani ning miring senadan anminchu kha Pathien Dan anga anmani ning anminchu!>

⁸ <<Nangni ning Pathien chongpe kha ninda-a khan miring ngai minchuna kha ninjui.>>

⁹ Khan Jesu ning atinok, <<Ninbing a minchuna kha minsethei nasik ninsing theina khaning Pathien Dan kha kinlep nasik lampui nin-neije.

¹⁰ Ajarchu Moses chongpe nakhan, <Napa le nanu nakaja sik,> khan, <Napa le nanu akathamak a nirilset inchu, nangkha thina apesik e.>

¹¹ Takkha nang minchunna khachu mi inkhat ning ang-mikhat apa a-imakli anu santheina anei inum, tak nang ning niti, <Hiwa hi Corban> tinachu, Pathien ta e,

¹² Amaning anpa a-imakli annu sansik ria minsan mukchujei.

¹³ Hi-ang hin minchuna kha milak ngaideng ninmintunga Pathien chongkha ninten jei. Khana hi-ang kupo neinak alalak akatam nangni ning nintho.>>

Miring akimintheng mak neinak (Mat 15:10-20)

¹⁴ Khan Jesu ning mipui ngaikha ama kolla akoinok a khan anmanideng aleiti, <<Nangni rikip kachongril hi rangairu, khan jet ru.

¹⁵ Tol ria miring sunga alut khaning mi minchokmak. Miring sunga ria ahongkusuok khaning mi aminchok.>>‡

¹⁷ Amaning mipui ngaikha aleimathaanli khan inn inkhat a aleilut, ama thiemroi ngaining achongril kha minchen nasik anleirakal.

¹⁸ Jesu ning anmanideng aleiril, <<Nangni milak ngainek a jetna neidet muk chu. Jetlei mo nin e? Tol ria miring sunga alut khaning amakha amintheng edet mak,

¹⁹ ajarchu khawa kha amulung sunga lutmak tak awon sunga akulut e, khawa so-a ataksa ria tolla ahongsuok e.>> (Jesu ning hiwa aril nahi, baksik rikip akintheng tia amalar.)

²⁰ Khana amaning arilnok a, <<Miring ria aheikusuok khan amakha aminchok e.

²¹ Ajarchu mi mulung sunga ria, akathamak mindonna kha aheisuok a khawa khaning amakha akathamak amintho, hurna, muruk, mithatna,

²² mi numei-arother setpuina, phamrai kase, khan akathamak rikip akatho; wartheng kiril, ra-ot, omchen kathamak, mikirilset, kin-or, khan akapang,

²³ Hiwa akathamak rikip ngai hi miring mulung sunga ria aheisuok e khana khawa khaning ama amintheng mak e.>>

* 7:4 Ang-rikip akinjor nari anheichoi neinak kha amasatak ansop; ang-rikip akinjor nari anhong inum anmani amasatak akinsop. † 7:4 Akinje alek a chu phenchung om-mak. 7:6 Is 29:13 7:10 Hon 20:12; 21:17; Thm 20:9; Dan 5:16 ‡ 7:15 Akinje alek achu alam 16 anhap: *Rangai ru, khanchu, ninkuor a-om inchu!* (Anri 4:23)

*Nupui inkhat taksenna
(Mat 15:21-28)*

²⁴ Khan Jesu ning khawa mun kha amathanli Tyre khopui kolla a ase jei. Amaning inn inkhat sunga aleilut khan khawa mun na a-om kha tute ning anjet sik leimonom mak, tak akinthup a akasot leiom tor mak je.

²⁵ Asanu sunga ratha kathamak kulut nupuinu khaning Jesu chungchanga ajetli kinranga ahonga akekunga aleikinbok.

²⁶ Khawa nupuinu kha Syria ram a Phoenicia ramsung a akinte Jat-lop mi inkhat e. Khawanu khaning asanu ria khori kha Jesu ning aholsut penasik aleiti.

²⁷ Takkha Jesu ning aleimasang, <<Amasatak a naipang ngai wai minkhop di ri. Naipang ngai bu kha kusut a ui deng pesik chu akidik imak.>>

²⁸ Khawanu ning aleimasang, <<Oja, ui ngainum naipang ngai bakbang dokhang thoi-a akata ngai kha anbak e!>>

²⁹ Khawa jarra Jesu ning khawanu deng aleiti, <<Kha ang nana heimasang jarra, ni inteng kir toro, nasanu ria khori asuok kha nawamu sik jei!>>

³⁰ Khawanu kha inteng akirra asanu phenchunga ajal kha awamu; khori kha asanu ria adiktabak aleisuok jei.

Jesu ning akachong theimak le akuornum kiset inkhat amindam

³¹ Khan Jesu ning Tyre ramsung kha aleimathan a Sidon arakaan a, Decapolis (tinachu Khopui som) ramsunga aleise a khan Galilee tuitham teng aheiwa.

³² Miring alek ning akuor kiset, khan akatha akachong theimak mi inkhat anheiroi a, Jesu ning achunga akut adape nasik anlei ni.

³³ Khawa jarra Jesu ning amakha mipui ngai ria abinga akoisuok a, akutchalla amichil thonna akuor sunga aleithun li, khan amalei kha aleikotok pe.

³⁴ Khawa soa Jesu ning marwan chungteng a-enna, kinthuktak aphuk asanna, pasalpa denga aleiti, <<Ephphatha,>> tinachu <<Kinlong taro!>>

³⁵ Khawa pha takkhan pasalpa akuor ajet je, amalei asur kha omleia chong arilsuok torjei.

³⁶ Khan Jesu ning atu inkhat deng anril mak nasik mipuideng chong ape jei; tak amaning chong ape kha akikhella rilmuru atikha akakhella anlei ril jei.

³⁷ Khana akajet rikip ning anleingak jei. <<Ang rikip hi kho-ongtuk a akatha atho mije!>> anti. <<Kuur kiset naknum aminjet, khan akachong theimak aminchong thei!>>

8

*Jesu ning miring lising-minli awai
(Mat 15:32-39)*

¹ Sot lei-a mipui alop katamtak anhei kintup. Anmani ning baksik ite anleineimak lai, Jesu ning athiemroi ngaikha akoichunna aleiti,

² <<Hiwa mingai sik a kei kumulung apong, ajarchu anmani ngaihi kei le nithum kinhong ombung jarra, atunchu baksik ite neimuk jei.

³ Keining anmani bu minbak lei-a inteng kitir inchu, ansena lampui a ankinwai sik, ajarchu anmani alekchu ram kalaak ria anhong e.>>

⁴ Ama thiemroi ngaining amadeng aleirakal, <<Mi hiwajet wonminkhop nasik bu hi nerdiram hin atuning mo amutor sik e?>>

⁵ Jesu ning aleirakal, <<Waipol angjet mo ninnei?>>

<<Waipol sari,>> tia anmanining anleimasang.

⁶ Amaning mipui ngaikha leithoi-a kin-ongnasik chong aleipe. Khan amaning waipol sari kha alei a, Pathien minpakna anei, aherkhat akhoi a mipui ngaideng semnasik ama thiemroi ngai apejei; khan ama thiemroi ngaining kha-angkhan semna anei.

⁷ Anmani ning nga akisin aleknum anlei nei. Jesu ning hiwa sik num Pathien minpak na anei-a khan khawa nga khanum thiemroi ngaideng mipui semnasik aleiti.

⁸⁻⁹ Mi rikip ning akakhop a anleibak, mi lising-minli kopo an e. Khan thiemroi ngaining anbak bang akinlek awer-awai

taidon sari kisip anlei rut. Jesu ning mipui ngaikha aleiminse jei.

¹⁰ Khan kinrang a thiemroi ngai le rukuong anchong a Dalmanutha ramteng anleise.

Pharisee ngaining sinkinlak malarnasik anni
(Mat 12:38-42; 16:1-4)

¹¹ Pharisee alek ning Jesu deng anheiwa a amale anleikinkher. Anmani ning anchang kam a min-ok sik anleimonom, khawa jarra Pathien ning minthana nanei tikha sinkinlak a naminmuro tia anleini.

¹² Takkha Jesu ning kinthuktak aphuk akasaanna aleiti, <<Ang jarra mi tunlai khang mingai ning sinkinlak sik anarakal? Kei ning nangnideng kidik a kiniti, kha imak! Hiwa mingaideng khawa angkopo mu minchenna kha kinpe noning!>>

¹³ Amaning anmani ngaikha aleimathaanli, rukuong achuong nok a, khan tuitham ralkhat teng rakaan nasik anleitho jei.

Pharisees Le Herod ngai chol
(Mat 16:5-12)

¹⁴ Thiemroi ngaining ankhop nasik waipol heichoi sik kha anlei mingil je, rukuong sunga anmani waipol inkhat bei anleinei.

¹⁵ <<Kinsingthei ru,>> Jesu ning anmanideng aleitipe, <<khan nangni ning Pharisees ngaile Herod Chol chungga kinsingthei inlang kinrin ru.>>

¹⁶ Anmani seng kinbekna anleinei a anleiti, <<Eini ning waipol ninei mak jarra amaning hiwahi ati e.>>

¹⁷ Jesu ning anmani ngai ankinbek kha aleijet, khawa jarra amaning anmanideng aleirakal, <<Waipol a-om mak jarra nangni ning angsik mo ninkinbek e? Tun kutung lumu lajetlei mo nin e? Ninmulung kho-ongtuk mo alanger e?

¹⁸ Nangni mit ninnei, mu lei mo nin e? Kuor ninnei, rangaille mo nin e? Nangni ngaidon lei mo nin e

8:11 Mat 12:38; Lk 11:16 **8:12** Mat 12:39; Lk 11:29
Mk 6:14,15; Lk 9:7,8 **8:29** Jn 6:68,69

¹⁹ mi lising-ranga sik keining waipol ranga kakhoi kha? Akinlek awer-awai taidon kho-ongjet mo ninrut?>>

Anmani ning anleimasang, <<Somle-inni,>> anti.

²⁰ <<Khan keining mi lising-minli sik waipol sari kakhoi karra khan, akinlek awer-awai taidon kho-ongjet mo akisip ninrut?>>

<<Sari,>> tia anmani ning anleimasang.

²¹ <<Khan tun kutung nangni ning lajet lei mo nin e?>> tia Jesu ning aleirakal.

Jesu ning Bethsaida a mitkacho pasal inkhat amindam

²² Anmani ning Bethsaida teng anheiwa phakhan, mi alekning Jesu deng amitkacho mi inkhat an heiroi-a amadeng nakatok pero tia anleini.

²³ Jesu ning mitkachopa kha akut ning akeiroi a khosung ri aleisuokpui. Amit kha amichil thon pe soa, Jesu ning ama chungga akut ada a aleirakal, <<Angmikhat numu mi?>>

²⁴ Mipa khang chungteng ahei enna aleiti, <<O, Keining mi ngai kumutor jei, tak anmani kha thingkung kulon anga anpo.>>

²⁵ Jesu ning mipa mit a khan akut aleida nok a. Khawapha khanchu mipa kha amit aminsai kang a alei en, ama mit aleimunok a, angrikip akinthenga alei mutor jei.

²⁶ Jesu ning khawa soa mipa deng ati, <<Hiwa khosung hin kirnok rang maro.>>

Peter ning Jesu chungchang arilsuok
(Mat 16:13-20; Lk 9:18-21)

²⁷ Khan Jesu le ama thiemroi ngai Caesarea Philippi anti kho modonna anleise. Lampui ansena amaning anmanideng aleirakal, <<Nitiru Keideng, mi ngaining Keihi atumo ki-e aniti?>>

²⁸ Anmani ning anleimasang; <<Mi alek ning nanghi John Baptist aniti, alek ning Elijah ni-e aniti, alek ning Pathien chongkacho ngai karra inkhat ni-e aniti.>>

8:15 Lk 12:1 **8:18** Jer 5:21; Eze 12:2; Mk 4:12 **8:28**

²⁹ Amaning anmanideng aleirakal, <<Nangni ningle kei hi atumo ki-e ninti e?>>

Peter ning aleimasang, <<Nang Messiah ni-e.>>

³⁰ Khan Jesu ning anmanideng chong ape, <<Kei chungchang a atudeng num rilmuru.>>

Jesu ning apong nasik le athinasik aril (Mat 16:21-28; Lk 9:22-27)

³¹ Khan Jesu ning athiemroi ngaideng minchuna aphut: <<Miring Sapa kha akapong tak a a-om sik e khan Upa ngaining, thiempu chungnung, khan Dan Oja ngai ningnum nom nonung. Khana amakha anthat sik, tak nithum soli ama aring nok sik e.>>

³² Amaning hiwa hi kintheng tak a anmanideng aleirilpe. Khawa jarra Peter ning ama munlopteng aroi-a alei ren minphut je.

³³ Tak Jesu ning akinhei a, ama thiemroi ngaikha alei en, khan Peter kha alei ren khan aleiti. <<Komodon ria suokro, Seitan, Nang mindon kha Pathien ria imak tak miring senadan e!>>

³⁴ Khan Jesu ning mipui le ama thiemroi ngai kha amadonna akoi. Amaning anmanideng aleirilpe, <<Atu-tu inum mi inkhat ning kunuk jui kate ati inchu, ama abinga akindon mak sik e, a cross akadomma, khan kei anajui sik e.>>

³⁵ Ajarchu atu-tu inum abinga ringkho akinhuk nom ning akinmang sik; tak atu-tu inum kei sik le chong kintheng sik a aringkho akapesuok kha akinhuk sik e.

³⁶ Simleichung pumpui ata amin e inum, tak aringkho akinmang inchu amasik a anemna angmo a-om? Anemna om mak!

³⁷ Mi inkhat ning aringkho kha angle mo akinthul thei aom mi.

³⁸ Mi inkhat ning keijarra, kei minchunna jarra, em le hur apha akathamak sunga hin kei minchuna chungchang a akinjak inchu, Miring Sapa le Apa lurna sunga marwan tirlle kintheng ngaile anhongning khan amaning num amachunga ankinjak sik e.>>

9

¹ Khan Jesu ning anmanideng aleiti, <<Keining akidiktak nirilpe kate, Pathien Rengram kha ranak le kinroi a akahong anmani ning anmumak laiseng khawakhan alek akithimaksik an-om.>>

Maiso akinthul (Mat 17:1-13; Lk 9:28-36)

² Niruk soa Jesu ning Peter, James khan John, anmani ngaikha ching kinsang chung a aleiroi, khawa munna anmani bei anleiom. Anmani maikunga Jesu maiso kha aleikinthul,

³ Khan ama ponder ngaikha ahongcheklak, simleichunga atu inkhatning asop minchektor maksik nek a aleichek.

⁴ Khan athiemroi inthum ngaining Moses le Elijah ning Jesu le ankinbek kha anleimu.

⁵ Peter aheichong a Jesu deng aleiti, <<Oja, angtuk akathami keini ning hiwahi kin-omhi! Keini ning hiwa munhin pon-inn inthum kinbol sik, nang sik inkhat, Moses sik inkhat, khan Elijah sik inkhat.>>

⁶ Ama le alak ngaikhan anchihei a amaning angmo atisik e leijet mak.

⁷ Khan Sumphai inkhat ahongsuok a adaililip ning aleimukhu, khan Sumphai ria rasa inkhat ahonga, <<Hiwahi kasapa mirit tak e, ama achong rangai ru!>>

⁸ Anmani ning kinrangtak ankol a anleien tak atute leimu muk; Jesu bei kha ankarra aleiom.

⁹ Anmani Ching ria anhei chum lai, Jesu ning anmanideng chong aleipe, <<Miring Sapa kha thina ria aring mak laiseng, ninmu ngaikha atu dengnum rilsuok muru.>>

¹⁰ Anmani ning chongpe ngaikha anjui, tak anmani karra bei chongkha kinbekna anleinei, <<Thina ria ringna, atih angmo atina e?>>

¹¹ Khana anmani ning Jesu deng aleirakal, <<Moses Dan Oja ngaining Elijah masatak ahong sik anti hi angsik jarra mi?>>

¹² Amaning aleimasang khachu, <<Elijah kha e angrikip kimintuk

akahong masa sik e. Kha inchu angsik jarra mi Pathien chong kintheng ning Miring Sapa kha apong angjet adeisik, khan mi ngaining nomenonung atihi angsik jarra mi?

¹³ Takkha Kei ning nangni deng kiniti, Elijah chu aleihong sojei, khan chong kintheng ning ama jarra aleiti anga, mi ngaining ama chung a anthonom kha aleithoso jei.>>

Jesu ning Ratha kathamak kulut pasalnai inkhat amindam (Mat 17:14-20; Lk 9:37-43a)

¹⁴ Anmani ning thiemroi alak ngai deng anhong kar, mipui katamtak ngaining akihilla, Moses Dan Oja alek le anmanile ankinkher pui kha anleimu.

¹⁵ Mipui ngaining Jesu anleimu pha, anmani ning anleingak, khan amadeng kinranga anse a anleidon.

¹⁶ Jesu ning ama thiemroi ngaideng aleirakal, <<Ang jarra mi anmani le ninkin kherpui?>>

¹⁷ Mipui ngai karra pasal inkhat ning aheimasang, <<Oja, keining kasapa nangdeng kaheiroi, ajarchu ratha kathamak asunga a-om khan achongnum suokmak.

¹⁸ Ratha khaning ama asur katai a, leithoi a apur, abai a achilphon asuok, aha aleikarot, khan atak kha aleichangkhang: Khawa jarra keining nang thiemroi ngaideng ratha kha noholsuok penasik kaleiti, takkha anmani ning leiholsuok tor muk.>>

¹⁹ Jesu ning anmanideng aleiti, <<Angtuk a taksenna kaneimak nangni ngai! Angtuk kosot kei ning nangni le kalaom bung sik mi? Angtuk kosot kei ning nangni kha kanaladei pui sik mi? Naipangpa kha keideng heiroi ru!>>

²⁰ Anmani ning amakha Jesu deng anheiroi.

Ratha khaning Jesu aheimuli, naipangpa kha akeichanga ahong dengjuon, khan leithoi a ata a aleikinloi khan abai a achilphon aleisuok.

²¹ <<Angtuk kusot mijeji hin atinahi?>> Jesu ning apa deng aleirakal.

<<Naipang achang lai ria e tia,>> amaning aleimasang.

²² <<Apha angjet akathamak ratha ning amahi thatnasik a meisunga le tui sunga adenglut e jei. Nang ning nanatho petor inchu, nimirang inlang khan nasen ro!>>

²³ Jesu ning amadeng aleiti, <<Angsik mo niti e, nator inchu? Taksenna kanei amasik chu angrikip a ithei e.>>

²⁴ Apa ning kinranga ahei ong a, <<Kei taksenna kanei, tak pui tukmang. Akatam det kanei thei nasik nasen ro!>>

²⁵ Jesu ning mipui kha anmani omnateng anheinai amukar khan, amaning ratha kathamak deng khan chong aleipe. <<Kuurset le chong akasuokmak ratha,>> Jesu ning aleiti, <<Naipangpa ria nang hei suok inlang khan amadeng lutkhir nok moro tia kei ning chong kanape!>>

²⁶ Ratha khan akheek a, naipangpa kha mel kasetak akeichang er a ahong dengjuon na khan asuok jei. Naipangpa kha akithi anga, khan mirikip ning anleiti, <<Amahi athije!>>

²⁷ Takkha Jesu ning naipangpa kha akut ama-o a aleikeiding, khan ama ahongngir jei.

²⁸ Khawa soa Jesu ning insung alut kar, ama thiemroi ngaining ruk a aleirakal, <<Angsik jarra mi keini ning ratha kha kinholsuok tor mak?>>

²⁹ Jesu ning aleimasang, <<Hiwa ngaihi Pathien nina bei ning aholsuok tor e, alak inkhatte ning tor mak.>>

Jesu ning athina sik chong aril nok (Mat 17:22,23; Lk 9:43b-45)

³⁰ Jesu le ama thiemroi ngai ning khawa munkha anleimathaanna Galilee anraakaan a anleise. Jesu ning atudeng num ama sena leiminjet nommak,

³¹ ajarchu ama thiemroi ngaikha aleiminchu: <<Miring Sapa kha mikathat ngai kutchunga akinpe sik. Nithum soli ama ahongring nok sik.>>

³² Tak anmani ning hiwa minchu nahi lejjet tor muk, khan anmani ning amadeng akarakal sik anleichi.

Atumi akoloktak?
(Mat 18:1-5; Lk 9:46-48)

³³ Anmani ning Capernaum a anheiwa a, khan insung anlut kar Jesu ning ama thiemroi ngaideng aleirakal, <<Nangni ning lampui ton-na ang jarrami nin kinkher?>>

³⁴ Takkha anmani ning leimasangmuk, ajarchu lampui a anhei kinkher na khachu anmani karra atumi akolok tak ti jarra e.

³⁵ Jesu ning akin-onga, athiemroi somle inni ngaikha aleikoi, khan anmanideng aleitipe, <<Atu achang inum amasa kachangnom khaning atorna le mi rikip sok abinga achang ngersik e.>>

³⁶ Khan amaning naipang inkhat aheiroi a khan anmani maikunga aleiminngir. Amaning akoko-a anmanideng aleiti,

³⁷ <<Tu achang inum kei rilinga hiwa naipang inkhat akaralang kha, kei anaralang e; khan tu inum kei anaralang mi khaning kei bei anaralang ilei a kei anahong kitirpa khanum aralang e.>>

Atu inum eini anikinhal puimak mikha eini mi e
(Lk 9:49,50)

³⁸ John ning amadeng aleiti, <<Oja, mi inkhat ning khori ngai niringa aholsuok keini ning kinmu, khan keini ning amakha kinleikhap, ajarchu amakha eini rup karra akinchal imak.>>

³⁹ Jesu ning anmanideng aleiti, <<Amakha khap nasik thomuru,>> ajarchu kei rilinga sinkinlak kotho je mi ning khawa nukteng kinrangtak mi kha eini mi akathamak a nirilset noning.

⁴⁰ Ajarchu atu inum eini anikinhal puimak mi kha an e.

⁴¹ Keining akidiktak a kiniril pe e, nangni keita ninchang jarra, tuidai hai inkhat bei anakape tu inum athoman kha aphanng nger sik e.

Setna thonasik mithemna
(Mat 18:6-9; Lk 17:1,2)

⁴² <<Atu inum hiwa naipang kisin inkhat taksenna minmang nasik akatho mikha atu achang inum aringa chakri lung kolok inkhat khit makhai pe-a tui-ongpui sung matasik khawa khaning ama sik athadet.

⁴³ Khawa jarra nukut khaning nataksenna aminmang inchu, tanro! Nukut akikip a akithiphit maksik meikhur nulutsik nek chu kut kinchel lei-a kumsot ringna naphasik khaning athadet.*

⁴⁵ Khan nike khaning nataksenna aminmang sik inchu, tuktan ro! Nike akikip a meikhur a nulutsik nek a nike kinchel lei-a kumsot ringna naphang sik khaning athadet.†

⁴⁷ Khana nimit khaning nataksenna aminmang sik inchu, kelsuok ro! Mit akikip a meikhur a nulutsik nek chu mit inkhat bei le Pathien Rengram nulutsik khaning athadet.

⁴⁸ Khawakhan <anmani kabak rulung ngaikha thiphit muk, khan anmani anrona mei akakang khanum thiphit mak.>

⁴⁹ <<Maicham neinak kha michi ning amintheng anga mi rikip num mei ning amintheng sik e.

⁵⁰ <<Michi hi akatha e; Tak a-elna kha asep jei inchu, kho-ongmo ninmin el theinok sik e?

<<Nangni sap ninchangna michi kha ninbinga kara nei ru, khan inkhat le inkhat kahoi kadai om ru.>>

10

Jesu ning kinthen chungchanga aminchu
(Mat 19:1-12; Lk 16:18)

¹ Khan Jesu ning amun kha aleimathaanli, Judea ramteng ase je, khan Jordan Tuidung arakaan je. Mipui ngai amadeng anhong kinchun nok je,

9:34 Lk 22:24 **9:35** Mat 20:26,27; 23:11; Mk 10:43,44; Lk 22:26 **9:37** Mat 10:40; Lk 10:16; Jn 13:20 **9:40** Mat 12:30; Lk 11:23 **9:41** Mat 10:42 **9:43** Mat 5:30 * **9:43** Akinje alek a alam 44 anhap: <Khana anmani kabak rulung kha thiphit mak, khan anmani anrona akakang mei khanum thiphit mak> (alam 48 a anri) † **9:45** Akinje alek a alam 46: <Khana anmani kabak rulung kha thiphit mak, khan anmani anrona akakang mei khanum thiphit mak> (alam 48 a anri) **9:47** Mat 5:29 **9:48** Is 66:24 **9:50** Mat 5:13; Lk 14:34,35

amaning anga-ngai atho anga
anmanideng aleiminchu.

² Pharisees alek amadeng anhonga
khan anchangkhith a min ok nasik anlei
tho. Amadeng anleirakal, <<Mi inkhat
ning anumei akinthen pui sik hi eini Dan
ning anom mi, nimirjet ro?>>

³ Jesu ning chong rakal le kinroi a
aleimasang, <<Moses ning nangni
kho-ong Dan mo anape?>>

⁴ Anmani chong leimasang khachu,
<<Pasal inkhat ning kinthen na jedet
inkhat amije a anumei kha akinthen pui
nasik Moses ning chong aleipe.>>

⁵ Jesu ning anmanideng aleiti,
<<Nangni hi minjetna ninkintet jarra
hiwa Dan hi Moses ning aleimije e.

⁶ Tak akinphut bi a, abol minphut
phakkan, <Pathien ning pasal inkhat le
numei inkhat abol,> Chongkintheng ning
aleiril.

⁷ <Khawa jarra khan Pasal ning apa le
anu ada a khan anumei le ankinchun sik
e,*

⁸ khan inni ngaikha inkhat anchang
sik.> Khawa jarra anmani kha inni chang
muk jei, tak inkhat bei anchang je.

⁹ Khan Pathien ning aminchun je kha,
miring tute ning khoithen muru su.>>

¹⁰ Anmani ning insung anheilut karra,
thiemroi ngaining Jesu deng khawa
chong chungchang anleirakal.

¹¹ Jesu ning anmanideng aleirilpe,
<<Pasal ning anumei akinthen pui-a khan
numei alop a-ompui inchu anumei engset
a akajong e.

¹² Khale akin anga, numei ning arother
akinthen pui-a khan pasal alop a-ompui
inchu arother engset a akajong e.>>

Jesu ning naipang ngai ralwantha ape (*Mat 19:13-15; Lk 18:15-17*)

¹³ Mi alek ning naipang ngaikha Jesu
ning anchung a akut ada nasik anhei roi,
tak thiemroi ngaining mi ngaikha
anleiren.

¹⁴ Jesu ning khawa amu karra, ama
aranga athiemroi ngaideng aleiti,
<<Naipang ngaikha kei komodonna

hongrusu, anmanikha khap muru,
ajarchu Pathien Rengram kha anmani
kupo ang ta e.

¹⁵ Keining akidiktak a kinirilpe e atu
achang inum Pathien Rengram kha hiwa
naipang inkhat kupo a aralang mak
mikha khawa muna khan lut noning.>>

¹⁶ Khan Jesu ning naipang ngai kha
akako-a, anmani rikip chung a akut ada a,
khan ralwantha aleipe.

Mikanei pa

(*Mat 19:16-30; Lk 18:18-30*)

¹⁷ Jesu ning akase alei phut nok a, mi
inkhat ning amadeng ahong taan a, amai
kunga ahong kinkun a, khan amadeng
aleirakal, <<Akatha Oja, kumsot ringna
chan nasik keining ang-mo kotho sik e?>>

¹⁸ Jesu ning amadeng aleirakal,
<<Angsik mo keihi akatha nanakoi e?
Pathien elei-a akatha atute om mak.

¹⁹ Nang ning chongpena kha najet: <Mi
that moro, jong moro, muruk moro,
akidik mak ning mi maher moro; mi
rilset moro; nanu napa chong juiro.> >>

²⁰ Mipa khang aleiti, <<Oja, hiwa
chongpena rikip ngai hichu kisin lai ria
kahei jui ijei.>>

²¹ Jesu ning ama minreng pum a a-en
kang a, amadeng aleiti, <<Nang nupui tuk
mak na inkhat bei a-om. Se ro khan nanei
rikip kha wajor ro, khana sara akapong
ngaideng sumsan wapero, khanna nang
ning marwan na nei le hoina nanei sik;
Khan hong inlang kunuk nujuiro.>>

²² Mipa ning kha ajet karra, amaiso tai
mak je, khan mulung kopong tak a alei se
je, ajarchu mipa kha mikanei tak e.

²³ Jesu ning athiemroi ngai a-en kiwel a
anmanideng aleiti, <<Mikanei ngai
Pathien Rengram lut sik hi kho-ongtuk a
akintet mi je!>>

²⁴ Thiemroi ngai kha khawa chong
khang anmulung alei katok je, tak Jesu
ning ahei rilnok a, <<Naipang ngai,
Pathien Rengram lut sik hi khongtuk a
akintet mi je!

^{10:4} Dan 24:1-4; Mat 5:31 ^{10:6} Aph 1:27; 5:2 ^{10:7} Aph 2:24 * ^{10:7} Manuscripts alek a chu kinchal mak
khan anumei le ankinchun sik e. ^{10:11} Mat 5:32; 1 Cor 7:10,11 ^{10:15} Mat 18:3 ^{10:19} Hon 20:12-16; Dan
5:16-20

²⁵ Mikanei inkhat ning Pathien Rengram lut sik khanek a simphoi khur a Satingkui alut sik khaning abeidet.>>

²⁶ Chong kha anjet karra thiemroi ngai anleingak detje khan inkhat le inkhat anlei kin rakal je, <<Khan atu ning mi anuhuk tor sik?>>

²⁷ Jesu ning anmani ahei en-ngang a aleimasang, <<Hiwa hi miring sik a chu e tormak tak Pathien sik a chu aki e tormak om mak; Pathien sik a chu ang rikip a-ithei.>>

²⁸ Khan Peter ning ati, <<Enro, keining ang rikip kinmathaanna nunuk kinjui e.>>

²⁹ Jesu ning anmanideng aleiti, <<Adik, khana kei ning hi kini rilpe e, kei sik a le chongkahoi sik jarra, atu inum a-inn, ulenai, anu-apa, anaite ngai khanna leipuk akamoso je mikha,

³⁰ atun khang a hin akakhel det a apha sik e. Anmani ning reikhat kikhel inn, ulenai, nu le pa, salenai, khan leipuk anpha sik, khan pongna num amu sik; khan akahong sik khang a chu kumleiko ringna kha anchen sik e.

³¹ Takkha atun ma kakei katamtak ning nuk akintong sik, khan nuk akintong katamtak ning ma ankei sik.>>

Jesu ning athi sik chong woithum changna aril
(Mat 20:17-19; Lk 18:31-34)

³² Atun Jesu le ama thiemroi ngai Jerusalem lampui chungteng anleikal. Jesu ning athiemroi ngai nek a ma aleikei, khan anmani ning anleingak, khan anuk kujui alek ning chu mulung dongna le china anleinei. Woikhat nok Jesu ning athiemroi somle-inni ngaikha munlop tenga aroi je, khan achunga akosuok sik omchen aleiminjet.

³³ <<Rangai ru,>> amaning anmanideng ati, <<Eini Jerusalem teng nise sik khawa munna Miring Sapa kha thiempu chungnung ngaile Dan oja ngai kut chung akinpe sik. Anmani ning amakha thatnasik a anthosik khan Jat-lop ngai kut chung a npe suok sik,

³⁴ anmunui pui sik, anmichil thon sik, anrachak sik, khan anthat sik; tak nithumsoli aheiring nok sik e.>>

James Le John nina
(Mat 20:20-28)

³⁵ Khan Zebedee naite ngai James le John Jesu deng anhonga. Anmani ning anleiti, <<Oja, keini sik angmikhat nanatho pesik kinmonom.>>

³⁶ <<Khawa khachu angmi?>> Jesu ning anmanideng aleirakal.

³⁷ Anmani ning anleimasang, <<Narenggram kulur nakhan nareng kin-ongna chung a nikin ong kar, keini inni inkhat nachangteng khan inkhat nawoiteng nini min-ong sik a kinmonom.>>

³⁸ Jesu ning anmanideng aleiti, <<Nangni ning ninini kha nangni ning jetmuk chu. Keining ki-in sik pongna hai kha nangni nin-intor sik mi? Kei baptized kotho anga nangni nintho tor sik mi?>>

³⁹ <<Kintor sik,>> tia anleimasang.

Jesu ning anmanideng aleiti, <<Nangni ning kei ki-in hai kha nin in sik khan kei baptized katho anga nintho sik e.

⁴⁰ Takkha kei kachangteng le kawoiteng kin-ong nasik kadangna khachu keining tormang. Hiwa mun hichu Pathien ning anompe mi ngaideng ape sik e.>>

⁴¹ Alak thiemroi som ngaikha khawa chongkha anjet karra, James le John chung a anrang nom je.

⁴² Khawa jarra Jesu ning ankholo tal amadeng akoi-a aleiti, <<Jat-lop waikaron kin-e akiti ngai khaning anmi ngai chung a ranak annei, khana lamkakei ngai num pui kutuk a ranak annei.

⁴³ Kha achang inum, nangni karra chu kha imak. Ninkarra inkhat ning akalok achang nom inchu, alak ngaiseng sok anchang sik e;

⁴⁴ khan ninkarra inkhat ning ma akei nom inchu, mi rikip sok achang sik e.

⁴⁵ Ajarchu Miring Sapa kha ama sepa minthosik akahong imak; mikatamtak ngai sepa thosik le katansuok sik aringkho kape sik a akahong e.>>

*Jesu ning mitkacho Bartimaeus amindam
(Mat 20:29-34; Lk 18:35-43)*

⁴⁶ Khan anmani ning Jericho kutung anheiwa, khan Jesu le ama thiemroi ngaile mipuingaile kinroi a Jericho ria anhongsouk lai, Timaeus Sapa Bartimaeus mitkacho kutkodopa kha lampui kolla alei kin ong.

⁴⁷ Nazareth Jesu a-e ti ajet karkhan, ama aka-ong aphut je, <<Jesu! David Sapa! Kei nimirreng ro!>>

⁴⁸ Mi katamtak ning anlei ren khan a-om chen nasik anleiti. Tak amaning rasa kusuokdet a alei ong, <<David Sapa, kei nimirreng ro!>> aleiti.

⁴⁹ Jesu ning alei ngir a aleiti, <<Heikoi ru.>>

Khawa jarra anmani ning mitkachopa kha anlei koi. <<Rokpui ro! Kinding ro, amaning nang anakoi hi.>>

⁵⁰ Amaning apon aheikalek a, ahei kinchomma, khan Jesu deng aheiwa.

⁵¹ Jesu ning aleirakal. <<Angmo nangsik a kei ninimin thonom?>>

<<Oja, Kei kimit kumonok,>> tia amit kachopa khaning aleimasang.

⁵² Jesu ning amadeng aleiti, <<Setro,>> <<Nataksen khaning nang animindam e je.>>

Khawa laitak khan amaning amit aleimu a khan lampui a Jesu nuk aleijui je.

11

*Kulurtak a Jesu Jerusalem alut
(Mat 21:1-11; Lk 19:28-40; Jn 12:12-19)*

¹ Anmani Jerusalem anheinai a, Bethphage le Bethany khopui modonna, Olive chingtang a anhong je. Jesu ning ama thiemroi inni ma aleitir

² hi-ang hin aleiti: <<Ninma kho-a se ru, son nintung ri Salungdai atute ning anluchong mak inkhat ankhit ninmu sik. Khawa kha heisut inlang hin heikei ru.

³ Khan atumi inkhat ning, <Ang sik mi kha nintho e?> anahei ti inchu, Akupu* ning a aneiman nomna aom, khan aheithak nok kalen sik tiru.>>

* **11:3** Akupu. **11:9** Laa 118:25,26

⁴ Khana anmani ning anse-a lamsir-a Salungdai inkhat innkol anleikhit kha anleimu, Anmani ning ansut lai,

⁵ khawa khan akingir alek ngaining anmanideng anleirakal, <<Angsik mo Salungdai ninsut e?>>

⁶ Anmani ning anleimasang Jesu ning aleiminjet na ang a, khan alei kingir ngai khaning anlei minchoi je.

⁷ Anmanining salungdai kha Jesu deng anhei roi-a, achunga anpon ngai salungdai chung a, khan Jesu ning salungdai chung a aleichuong.

⁸ Mi katamtak ngaining lampui a anpon anpha a, alek ngaining lei kolla thingbaak anwatuk a khan lampui-a anleipha pe.

⁹ Khan amadonna akase le anuk kujui mingai khaning an-ong anleiphut, <<Pathien minpak ru! Puma riming a akahong amakha amachal atha!

¹⁰ Akahong sik nipa Reng David rengam kha Pathien ning ralwantha pe rase. Pathien minpak ru!>>

¹¹ Jesu Jerusalem aheilut a, Bek-inn sunga alut a, khan amaning ang rikip a-en. Tak kholei ahongtung je jarra athiemroi somle-inni ngai le Bethany teng anleisuok je.

*Jesu ning theichang kung ahakser
(Mat 21:18,19)*

¹² Ajing kini-a, anmani ning Bethany ria anhong kir nok a, Jesu awon aleicham je.

¹³ Akalaktak ria theichang kung abo kinbur inkhat aleimu, akara ngaikha a-om sik mi tia aka-en alei se. Tak amun atung karra, abo bei awamu je, ajarchu theichang ngai kinra pha lei imak.

¹⁴ Jesu ning theichang kung deng khan aleiti, <<Nakara atute ning bak nok rang muru su!>>

Khan ama thiemroi ngaining achongril kha anlei jet.

*Jesu Bek-inn aleise
(Mat 21:12-17; Lk 19:45-48; Jn 2:13-22)*

¹⁵ Anmani Jerusalem anheitung karra, Jesu Bek-inna aleise, Bek-inna neinak akajor le akaracho ngaiseng kha akaholsuok aleiphut jei. Amaning

sumsan kuthul ngai le pharphili kajor ngai ankin-ongna ngai kha amalet pe je,

¹⁶ Khan Bek-inn sumpuk kutung khan neinak kuchoi atute inkhat num leiminlut mak je.

¹⁷ Jesu ning khawa so-a mingai deng aminchu je: <<Khachu hiwa anghin akinje khachu Pathien ning aleiti, <Kei bek-inn hi jat rikip ngai nina inn akinti sik e.> Tak nangni ning muruk kinthupna ninminchang je!>>

¹⁸ Thiempu kolok ngai le Dan oja ngaining khawakha anjet je, khawa jarra ama that nasik a lampui aka-entok anphut jei. Anmani ning amakha anchi, ajarchu mipui ngai ning ama minchuna kha kinlak anleisak.

¹⁹ Kholei aheitung a, Jesu le ama thiemroi ngai khopui kha anleimathaan jei.

Theichang kung ri-a kinchuna (Mat 21:20-22)

²⁰ Jingteng ma, anmani lampui a anse lai, theichang kung kha anleimu. Khawakha arujung kutung a aleichar je.

²¹ Peter ning omchen akosuok kha amindon na Jesu deng aleiti, <<Oja, Enro, nahakser theichang kung kha achar je!>>

²² Jesu ning anmanideng aleimasang, <<Pathien taksen na nei ru.

²³ Keining akidiktak kiniril pe e, atu-tu inum hiwa chingbung hi kinphuk inlang tui-ongpui lai-a tanasik chong ape a khan amulung kei-chi o na neilei-a, takkha aril na chung a asuok nger sik tia akataksen mi khadeng akintho sik e.

²⁴ Khawa jarra kini minjet e: nangni ning Pathien nina ninnei a angmikhat ninni karra, kinmu je tia taksen ru, khan ninni rikip ngaikha akinpe sik e.

²⁵ Khan ningir a Pathien deng nina ninnei karra, marwan na akaom Ninpa khangning nintho thel ngairikip ana rangai mindam nasik a, atumi inkhat chung a mulung hoimak na ninnei rikip kha rangai mindam ru.>>†

11:17 Is 56:7; Jer 7:11 **11:23** Mat 17:20; 1 Cor 13:2
akinchal: *Milak ninrangai mindam mak inchu, marwan a akaom ninpa ning nangni thothel na ngai rangai mindam nape noning* (Mat 6:15 a anri) **12:1** Is 5:1,2

Jesu thotorna chungchang rakalna (Mat 21:23-27; Lk 20:1-8)

²⁷ Anmani Jerusalem a woikhat anhong tung nok je. Khanna Jesu kha Bek-inn sunga aleilon lai, thiempu kolok, Dan oja ngai khan upa ngai amadenga anlei hong

²⁸ Khan amadeng aleirakal, <<Hiwa ngai thotor nasik a ang ranak mo nanei? Hiwa thotorna hi atu ningmo anape e?>>

²⁹ Jesu ning anmanideng aleimasang, <<Keining chong inkhatbei narakal kate, khan nangning khawa kha nana masang inchu, keining ang thotorna ngai ningmo hiwa ngai hi kathotor e ti kini minjet sik.

³⁰ John ning baptized thotorna ranak anei kha khona ria mi, niti pe ru: Pathien ria a-imakli miring ria mi?>>

³¹ Anmani inkhat le inkhat ankinkher phut je: <<Angmi niti sik? <Pathien ria e,> niti inle kha amaning, <Kha-inchu ang sik mo John kha taksen lei nin e?> ati sik.

³² Takkha miring ria niti inum>> (Anmani ning mipui ngai kha anlei chi, ajarchu mi rikip ning John kha chongkacho pa e tia anlei.)

³³ Khawa jarra anmani ning Jesu deng aleimasang khachu, <<Keini jet mung.>>

Jesu ning anmanideng aleiti, <<Kha inchu, kisintho ngai hi ang thotorna ningmo katho e nangnideng niminjet noning.>>

12

Theiburbil kasaal ngai chongtekak (Mat 21:33-46; Lk 20:9-19)

¹ Khan Jesu ning anmanideng chongtekak ngai aleirilpe: <<Pha inkhat a theiburbil kiling mi inkhat aleiom, theiburbil sarapal aleikhar, theibur musorna sik khur inkhat aleichei, khanna berte inkhat aleibol, Khan atheiburbil kha akotho ngaideng asaljei khana a-inn amusoli khomol asejei.

² Theibur khekpha kha ahongtung pha, amaning asok inkhat theiburbil kasaal ngaideng asaal kalei sik aleitir.

11:25 Mat 6:14,15 † **11:25** Manuscripts alek a alam 26

³ Theiburbil kasaal ngai khaning asuokpa kha ansurra anleirachak, inkhatte palei a antir je.

⁴ Khan theiburbil kupu khaning asok lop inkhat atir nok, theiburbil kasaal ngai khaning alu anlei rachak a kinjak anleipe.

⁵ Akupu khaning suok lop inkhat atir nok, khan anmani ning amakha anlei that jei; khanna alak katam tak num kha-angkhan anlei tho jei, alekning anlei rachak, alekning an leithat jei.

⁶ Tir sik-a inkhat bei akaom khachu asapa mirittak kha e, Atorna tak a asapa kha theiburbil kasaal ngai deng atir jei. Amaning aleiti, <Kasapa hichu anmani ning anlei kaja nger sik tia kikin ngam.>

⁷ Takkha theiburbil kasaal ngai khaning inkhat le inkhat anlei kinbek, <Amahi theiburbil kupupa sapa e. Hongru that ri, khanna amaning phasik rikip hi einita achang sik jei!> anti

⁸ Khawa jarra anmani ning sapa kha ansurra anthat je khanna akithi kha theiburbil ralteng andengjon jei.

⁹ <<Kha achang inchu theiburbil kupupa khaning angmo atho sik jei?>> tia Jesu ning aleirakal. <<Ama ahong sik khan theiburbil kasaal ngaikha athat sik je khanna theiburbil kha milop deng aminsaal nok sik jei.

¹⁰ Akidik tak a hiwa chongkintheng hi nin leipa sik je?>>

<< Inn kasak ngai ning thamakjei tia andengjon lungkha ankarra apui koron achang je.

¹¹ Hiwa hi Puma ning atho e; Eini mit mu-a kho-ongtuk a akinlak mi!> >>

¹² Jehudi lamkakei ngai khaning Jesu sur sik a anlei kin thok e, ajarchu amaning chongtekak aleitho ngai kha anmani chung nga aril e ti hi anleijet. Takkha anmani ning mipui ngaikha anleichi, khawa jarra amakha anlei mathaanli anse jei.

Ramsel pesik chungchanga rakalna (Mat 22:15-22; Lk 20:20-26)

¹³ Jesu deng chong anrakalli surna sik a, Pharisees alek le Herod mingai alek amadeng aleitir.

¹⁴ Anmanining amadeng anhonga anleiti, <<Oja nangning mingai modonna inkhatte chilei-a akidik niril hi kinjet. Nangning atute mai enmak che, takkha mingai sik-a Pathien lungdo kha akidik a nalei minchu. Khanna Caesar denga ramsel pesik hi eini Dan akoi mi? Nipe sik mi? Nipe mak sik mi?>>

¹⁵ Takkha Jesu ning anmani changkam kha ajeta aleimasang, <<Angsik mo kei niminkhit sik niti e? Roman sumsan inkhat kha heichoi ru, khan keining enkate.>>

¹⁶ Anmanining sumsan inkhat anheicoi, khan amaning aleirakal, <<Tu milim le riming mo akinje e?>>

<<Caesar>> tia anleimasang.

¹⁷ Jesu ning aleiti, <<Caesar takha Caesar peru, khan Pathien takha Pathien deng peru.>>

Khana anmani ning Jesu kha anleingak je.

Thi ria ringnok chungchanga rakalna (Mat 22:23-33; Lk 20:27-40)

¹⁸ Khan Sadducee alekning, miring hi thi ria ring noning je akiti ngai, Jesu deng anhonga anleiti,

¹⁹ <<Oja, Moses ning hiwa dan hi keini sik-a aleimije: <Mi inkhat athi-a naite neilei-a anumei aleida inchu, anaipa inkhatning churmeinu kha aom pui nger sik, khawa jarra anmani inni annei naite ngai kha akithipa naite e tia anlei thei nasik e.>

²⁰ Pha inkhat a unai sari anlei om; upa tak khaning numei anei je khana naite neilei-a athi je.

²¹ Khan inni changnapa khaning numei kha aom puinok je, ama khanum naite nei lei-a athi nok je. Khanna inthum changnapa annaipa khanum kha-ang tit a asuok nok je,

²² khana alak ngaiseng: unai sari khaning num numei nu kha an ompui rip a naite nei lei-a anthi rip je. Atorna tak a, numei nu khanum athi je.

²³ Atunchu, akithi rikip ringnok ning nikho khan khawanu kha atu numei mo achang sik e? Anmani sari ning numeinu kha an lei ompui rip.>>

²⁴ Jesu ning anmanideng aleimasang, <<Kho-ongtuk a nintho thel ije! Khana ang sik jar mi ti hi ninjet mi? Hiwa hi nangni ning chongkintheng le Pathien ranak kha ninjet mak jarra e.

²⁵ Ajarchu akithi ngai kha anringnok pha, anmani ngai kha marwan tirlu kupo anchang sik jei khan innei omno ning jei.

²⁶ Atunchu, akithi ngai anthei sik jarra: Moses jedet rubu a thingbur meikachoong chong akinje kha pangai lei mo nin e? Khawa khan hi-ang akinje tichu Pathien ning Moses deng, <Kei Abraham Pathien, Isaac Pathien, khanna Jacob Pathien ki-e,> ati.

²⁷ Amahi akiring ngai Pathien e, akithi ngai Pathien imak. Nangni ninthel rangra jei!>>

Chongpena koloktak

(*Mat 22:34-40; Lk 10:25-28*)

²⁸ Dan oja inkhat ahong a anmani ankinbek kha alei rangai. Jesu ning Sadducees ngai deng chong katha masang kha aleimu. Khawa jarra akolla ahonga chong aleirakal: <<Chongpena karra kho khamo akolok tak e?>>

²⁹ Jesu ning aleimasang, << <Israel ngai rangai ru! Puma eini Pathien bei kha e ni Puma.*

³⁰ Puma ni Pathien kha numulung pumpui, naratha pumpui a, nimindonna pumpui, khanna naranak ratna pumpui ning minreng ro.>

³¹ Khanna inni changna chongpena koloktak khachu: <Nang nabinga nikinreng anga nokho niweng minreng ro.> Hiwa inni ngai kikhella chongpena kolok alop om-mak.>>

³² Dan oja khaning Jesu deng aleiril, <<Oja! Nangning akidik a niriljei, khachu Puma khabei e Pathien, ama ilei a alop Pathien ommak.

³³ Khan Pathien kha numulung pumpui, nimindonna pumpui khan

naranak ratna pumpui a minrengro, khan nibing a nikinreng anga nokho niweng minrengro, Hiwa chongpe inni kujui hining Pathien deng ran le kinthoina kapenek a mei a natak pumpui aro minkang nek a atha det.>>

³⁴ Amaning kinsing thei tak a amasang kha Jesu ning amupha, amadeng aleiti, <<Nang Pathien Rengram ria akalak ommak che.>>

Khanchu atute ning Jesu deng chong rakal tor muk jei.

Messiah chungchang rakalna

(*Mat 22:41-46; Lk 20:41-44*)

³⁵ Jesu ning Bek-inn sunga aminchu lai, chong aleirakal, <<Dan oja ngaining Messiah kha David sonlepar kha e tia kho-ongmo anti thei?

³⁶ Ratha Kintheng ning David murtak a amin rilsuok:

<Puma khaning kei Puma deng aleiti: Ninkin muda ngaikha nike thoi a

kada mak kar seng

kachang teng hin kin ongro>

³⁷ David khet ning amakha <Puma> tia akoi; achang inchu kho-ongmo Messiah kha David sonlepar achang thei sik?>>

Jesu ning dan Oja ngai renna

(*Mat 23:1-36; Lk 20:45-47*)

Khana mipui ngaining Jesu chong kha rokpu a anlei rangai.

³⁸ Jesu ning anmani aminchu a anmanideng aleiril, <<Dan Oja ngai ri a kinsing thei ru, songkol kasei akinhak a akolon nom ngaikha keithella amin kajanom

³⁹ khan synagogues le bak minchunna mun kahoitak khan akin ongnom.

⁴⁰ Anmani ning Churmei ngai ria nemna an-entok khan insung neinak ngai anlei-leipe, mi musik a Pathien nina kosot tak a anleinei. Anmani kha karakna akakhel anpha sik!>>

Churmeinu sumsanpe

(*Lk 21:1-4*)

⁴¹ Jesu kha sumsan dana mudonna akin ong lai mipui ngai sumsan minbuk

na pelom kosuok anpe kha a-enlai mikanei katamtak ngai ning sumsan akatampui anlei mata;

⁴² khan sara churmeinu inkhat num ahong a ana inni sumsan inkhat dam awothun minlut.

⁴³ Jesu ning athiemroi ngai akoi mintup a anmanideng aleiril, <<keining akidik tak kinirilpe hiwa sara churmeinu ning sumsan minbukna akape ngai seng karra akatam akape kha e.

⁴⁴ Ajarchu alop ngai seng khaning akatam annei na ria ankhoi then li anpe e, takkha hiwa nu ning asara chang aneiseng, aringna sik a aminbuk rikip kha ape e.>>

13

Bek-inn ahongkoi sik Jesu ning aril
(Mat 24:1,2; Lk 21:5,6)

¹ Jesu ning Bek-inn ria aheisuok pha, thiemroi inkhat ning amadeng aleiti, <<Enro, Oja! Lung ngaile innpui ngaihi kho-ongtuk a ennom kaom mi!>>

² Jesu ning aleimasang, <<Innpui kolok ansak ngaihi ninmu mi? Lung ngai hi inkhat nak num an omna ria leida noning; hi ngai rikip hi alachim sik.>>

Pongna le Jengna
(Mat 24:3-14; Lk 21:7-19)

³ Bek-inn ralkhat teng Jesu kha Olive Chingtang chung a lei kin ong, Khawa pha Peter, James, John khan Andrew ruk-a amadeng anleihong.

⁴ <<Hiwa hi angtuk karra mo asuok sik e niminjet ro,>> anmanining anleiti, <<khana hi seng ahongsuok sik pha kha ahongtung jei ti hi jetna sik angmo ahongsuok sik nirilpero.>>

⁵ Jesu ning anmanideng aleiti, <<Kinsing thei ru, khan atu khat ning nangni akalet teng ana roimak nasik tho ru.

⁶ Mi katamtak ning, kei kiriminga anheiwa antisik, <Kei amakha ki-e!> khan mi katamtak ngaining akalet lampui a anroi sik.

⁷ Raal kindei le, raal chong kinthang ninjet phakhan chimuru. Khawa kha

ahongsuok nger sik e, takkha atorna li-imak.

⁸ Ajarchu jat inkhat le inkhat ahong kinsol sik; khan Rengram inkhat le inkhat raal ankin dei sik. Amun rikip a ringnu akinnok sik, khan bak le in aboi sik. Kha ngai kha nai neisik teng naiha kuphu akana kinphutna pong anga a-e sik.

⁹ <<Nangni ninbing a nin kin singthei nger sik e. Nangni anasur sik khan chongtan na munna ana keiso sik. Synagogues a nangni anarachak sik; kei sik a waikaron ngaile rengngai maikunga ninlangir sik e, Chongkahoi anmanideng ninril jarra e.

¹⁰ Tak atorna ahong tung makma chongkahoi hi mi rikip deng ninril nger sik e.

¹¹ Khana nangni anasur a khan chongtan na mun na anaroi sik, angmo kiril sik tia khawa pha khan ninmulung mindongmuru; apha kha ahong tung sung a chong akinpe ngai kha ril ru. Ajarchu nangni ninril sik chong kha nangni ria imak; ratha kintheng ria akahong suok sik e.

¹² Mingai ning ulenai tak kha that sik a anpesuok sik, khanna Pa ngaining num anaite ngai kha kha-ang khan anthosik. Sa le nai ngaining num Nu le Pa ngai chung a anranga that nasik anpesuok sik.

¹³ Kei jarra mi rikip ning nangni anahal sik. Tak atu inum ahekna kutung angirtor inchu hukna achen sik e.

Kinrimna chi ka-om tak
(Mat 24:15-28; Lk 21:20-24)

¹⁴ <<Kinrimna Chikaom tak kha, a-om makna sik mun a ahong ngirkha ninmu sik.>> Akapasuok khaning ang tina mi jet thei rase! <<Khawa phakhan Judea ram a kaom ngaikha Chingteng taan rang rusu.

¹⁵ Inn chung a akaom mi khaning insunga aneinak kalei sik ahongchumli apha minmang marase.

¹⁶ Khan leipuk a akaom mi khaning apon kalei sik a-inna hei kir-rang ma rase.

17 Khawa phakhan nai koron ngai le naidong kanei sik a angtuk a chikaom sik mi!

18 Hingai hi phelbi lai asuok mak nasik Pathien nina neiru!

19 Ajarchu khawa kini ning a kinrimna ngaikha, Pathien ning Leithoichung abol phut lim ria kinphut atun kutunga miring ngai anjet kinrimna ngai, hiwa anghi ret suoknok no ningjei.

20 Takkha Puma ning khawa kini ngaikha aminbong je; aminbong mak inchu, atute ringtor noning. Ama kadangsuok ngai sik jarra kini ngai kha amintom det e.

21 <<Khawa jarra tu achang inum mi inkhat ning, <Enru, Messiah kha hin a-om!> a-imakli, <Enru, son-na a-om!> antia achang inum taksen muru.

22 Messiah akidikmak ngaile akidikmak pathien chongkachoi ngai anhong kinlarsik. Anmani ning sinkinlak le ngakna angjet anthosik khan a-ithei inchu Pathien akadangjei mi ngainum akalet teng roina sik antho sik e.

23 Kinsing theitak a omru! Apha kha aheitung maklai angrikip kini minjet ijei.

Miring Sapa hongnasik (Mat 24:29-31; Lk 21:25-28)

24 <<Khawa pongnapha nikho ator inchu kini kha ajingsik, tha kha war noning je,

25 arsi ngaikha marwan ria anhong ta sik, khanna boirok a akaom ngai kha ahong kinnok sik.

26 Khan Miring Sapa kha ahong kinlar sik, alurna thotorna le kinroi a Sumphai chungahong chum sik.

27 Khan akadang so sa ngai akoi mintup nasik marwan tirlle ngai leithoichung rikil minli amor inkhat teng ria aphut a inkhat teng kutung amaning atir sik je.

Theichang kung ria kinchuna (Mat 24:32-35; Lk 21:29-33)

28 <<Theichang kung ria kinchuna neiru. Theichang abaak ngai ahong em a ajik ahong cher a khan abo ther

ahongsuok inchu, kholum pha anai je ti hi nangni ning ninjet.

29 Khawa le akin angrip a, hiwa omchen ngai hi ahongsuok ninmu je inchu, apha anai je, ahong nasik akinthok je.*

30 Akidik a keining nangni deng kinitipe e, miring akaring ngai anthiso maklai omchen rikip hi asuok sik e.

31 Marwan le Leithoichung chu akin mang sik, takkha Kei kachong chu kinmang phit noning.

Atute ning kini le pha kha jetmuk (Mat 24:36-44)

32 <<Khawa Kini le pha kha, marwan tirlle ngai ning num, khan asapa ning num atute ning jetmuk, Apa bei ning ajat e.

33 Kinsing thei tak a kinrin chak ru, ajarchu apha kha angtuk karra mo ahongtung sik nangni ning jet muk chu.

34 Mi inkhat ning khomol sik a inn adadoi pha, asok ngai ansin thosik ape-a, inkhar kangakpa deng kinrinchak nasik chong ape ang kupo e.

35 Khawa jarra kinrinchak ru, ajarchu inn kupupa kha kholei achanga, janchim achanga, jintengma a-imakli sun achanga angtuk karra mo ahong sik nangni ning jetmuk chu.

36 Jet lei thei lei-a ama ahong tung inchu, najal naom kha numu marase.

37 Khan nangdeng kiril hi mi rikip deng kiti e: Kinrin chak ru!>>

14

Jesu thatna sik kinsepna (Mat 26:1-5; Lk 22:1,2; Jn 11:45-53)

1 Nini makma Rakan Reikahoi le cholphillei waipol, Thiempu kolok ngai le Dan oja ngai ning Jesu kha ruk a surna sik khan that nasik lampui anlei entok.

2 Anmani ning anleiti, <<Hiwa reikahoi sunga hinchu thomiri, lakanchu mipui kinhangna ahong e thei.>>

13:19 Dn 12:1; Rev 7:14 13:24 Is 13:10; Eze 32:7; Joe 2:10,31; 3:15; Rev 6:12 13:25 Is 34:4; Rev 6:13; Joe 2:10
13:26 Dn 7:13; Rev 1:7 * 13:29 apha anai je, ahong nasik akinthok je a-imakli ama ahong nai je, hong nasik akinthok je. 13:32 Mat 24:36 13:34 Lk 12:36-38 14:1 Hon 12:1-27

*Bethany a Jesu sarek ankanot
(Mat 26:6-13; Jn 12:1-8)*

³ Bethany khopui-a chi kaomtak ri kaphar aleikoron Simon inna Jesu kha bu abak a alei omlai, numeisa inkhat lungwar ning anbol akok kisip akintheng nard kung ria ansom amankatam sarek anchoi a anheiwa. Khawanu ning sarek kok kha amalong a sarek rim kahoi kha jesu luchunga aleibun.

⁴ Khawa mun na mi alekchu anmulung aleithe i inkhat le inkhat anlei kinbek a anleiril, <<Sarek rim kahoi aminmang hi anemna angmi?

⁵ Hiwa Sarek hi sumsan reijathum kikhella nijor* thei e khan sumsan kha sara khodeng kathei ngai pethei e!>> khana numeinu kha anlei rilset je.

⁶ Tak Jesu ning aleiti, <<Khawanu kha abinga daru! Angsik mo ninkachok e? Numeinu hi ning akathatak kei sik a sin atho e.

⁷ Sara ngai chu nangnile nin ompui chak sik, nangni ning nin monom pha rikip a nin sen thei e. Takkha kei chu nangni le pha rikip a ombung nomin.

⁸ Khawanu ning ator seng kha atho e; Sarek rim kahoi kuchunga akanot hi kikinphum ning sik makma anakanot ijei.

⁹ Tunchu, akidik tak a kini rilpe hi-e simleichung pumpui chongkahoi kinrilna munna, khawanu ning aleitho ngaikha ama mindonna le kinroi a akinril sik e je.>>

*Judas ning Jesu pesuoksik awanom
(Mat 26:14-16; Lk 22:3-6)*

¹⁰ Khan thiemroi somle inni ngai karra Judas Iscariot antipa khaning Jesu pesuok nasik thiempu kolok ngai deng alei se je.

¹¹ Anmani ning achong kha anjet pha anlei rokpu i, sumsan pesik a kintepna annei je. Khawa jarra Judas khaning Jesu kha anmanideng pesuok thei nasik lampui alei-entok je.

*Jesu ning athiemroi ngai rakan reikahoi
bu abakpui
(Mat 26:17-25; Lk 22:7-14,21-23; Jn 13:21-30)*

¹² Chol phillei Waipol reihoi nikho amasatak ning, Rakan reikahoi bak nasik keelmong ngai that ning nikho khan, Jesu thiemroi ngaining anleirakal, <<Rakan rei bakbung nasik nangni jarra khon mo kinbol sik a nomonom?>>

¹³ Khan Jesu ning ankarra miring inni aleitirra hi-ang aleiminjet: <<Nangni khopui a son seru, khanna tuibel kodom mi inkhat ninkin tongpui sik. Ama kunuk kha jui ru

¹⁴ Ama lutna inn, kupupa deng khan tiru: <Oja ning ka thiemroi ngai le kei Rakan reikahoi kinbak nasik inn kha khon mi?>

¹⁵ Khawa pha amaning inn chungden kolok tak, aminleng sa inkhat ani min musik, khanna khan ang rikip eini sik a ninmintuk sik e.>>

¹⁶ Khawa munkha athiemroi ngai anlei mathaanli, khopui teng anlei se jei, khanna Jesu ning aminjet ang kopo-a angrikip anwamu je; khana Rakan reikahoi bakbung nasik a anmintuk je.

¹⁷ Kholei ahong tung pha, Jesu ning thiemroi somle inni ngai le an hong jei.

¹⁸ Anmani ning dokhang chung a anbak lai, Jesu ning aleiti, <<Akidik tak a kini rilpe e ninkarra kei le kinbakbung inkhat ning kei anape suok sik.>>

¹⁹ Athiemroi ngai ning anmulung aleidong a, inkhat soli inkhat ning, <<Kei nini tina chu imak nu, a-e mi?>> antia amadeng anleirakal.

²⁰ Jesu ning aleimasang, <<Nangni somle inni karra inkhat, Kei le waipol kheeng sunga kinthun bungpa hi e.

²¹ Chong kinthenga aleikinje ang a, Miring Sapa kha athi nger sik e; takkha miring sapa akapesuok sik mipa kha angtuk mo amachal kase-e! Ama sik a alei kinte mak ning atha det sik e!>>

*Puma janbu bakminchunna
(Mat 26:26-30; Lk 22:14-20; 1 Cor 11:23-25)*

²² Anmani ning anbak lai, Jesu ning Waipol her kha alei a Pathien nina le minpakna anei a, aher akhoi a, khan a

thiemroi ngai deng aleipe, <<Kinlei ru, hiwahi kataksa e,>> aleiti.

²³ Khan amaning hai kha alei a, Pathien minpakna anei a anmanideng aleipe; khana richu ankholo a anlei in.

²⁴ Jesu ning aleiti, <<Hiwa hi mi katamtak sik a akolong, Pathien le kinnomna jetnasik kithisen kha e.

²⁵ Akidik tak kiniril pe e, Pathien Rengram ma theiburju ther kha ki-in mak karseng hiwa theiburju hi inno ning jei.>>

²⁶ Khan anmani ning laa ansak a, Olive chingtang teng anleise jei.

*Jesu ning Peter akinlep sik arildik
(Mat 26:31-35; Lk 22:31-34; Jn 13:36-38)*

²⁷ Jesu ning anmanideng aleiti, <<Nangni ninkholo a nintaan sik khanna kei nana mathaan sik je, ajarchu chong kintheng ning ati, <Pathien ning keelmong kakhal pa kha athat sik, khan keelmong ngaikha ankin chek chai sik jei.>

²⁸ Tak kei hi akiringa kathei nok li, Galilee a ninma a kalei se sik.>>

²⁹ Peter ning aleimasang, <<Alak ngai sengning analei mathaan inum keining chu nada phit noning!>>

³⁰ Jesu ning Peter deng aleiti, <<Keining nangdeng akidik tak kiniril pe e, atun jan tak hin arkhong ning woini akinram mak lai woithum rak kei hi jetmang niti sik.>>

³¹ Peter ning rasa kanger det-a aleimasang, <<Nang le nithi bung sik achang inum, kha-ang chu tiphit noning!>>

Khana thiemroi ankholo-a kha-anga anlei ti rip.

*Jesu ning Gethsemene a Pathien nina aleinei
(Mat 26:36-46; Lk 22:39-46)*

³² Anmani ning Gethsemene anti munkhan anhong je, khan Jesu ning thiemroi ngai deng aleiti, <<Pathien nina kanei lai hiwa hin kin-ong ru.>>

³³ Amaning Peter, James le John aleiroi. Khana kinrimna le mulung pongna achunga ahong tung je,

³⁴ khana amaning anmanideng aleiti, <<Kumulung hi adong hei-a thina sik kutung a ije. Hinnahin om inlang kinrinchak ru.>>

³⁵ Alek akalak det ase a, leithoi a akinbok-a, a ithei sik inchu khawa mulung pongna kha ama chungu asuok mak nasik a aleini.

³⁶ Amaning aleini, <<Apa, Kapa! Nang sik-a angrikip a-ithei rip. Hiwa mulung pongna hai hi kei ria nakhek pe ro. Khanum kei lungdo ilei a, nang nulungdo e rase.>>

³⁷ Khan ama ahong kirra thiemroi inthum ngai anleijal kha aleimu. Amaning Peter deng aleiti, <<Simon, nang najal mi je? Pung khatbei sik num akaher a om torlei mo ni-e?>>

³⁸ Khan amaning anmanideng aleiti, <<Kinrinchak ru, mathemna ninta makna sik Pathien nina neiru. Ratha ningchu amonom, tak taksa chu adol.>>

³⁹ Ama awasenok li Pathien nina, anga-ngai a aleineinok.

⁴⁰ Khan athiemroi ngaideng ahong kirnok a anleijal kha aleimunok; anmit lei malong tormuk. Khana anmani ning anmanideng angmo arilsik leijet mak.

⁴¹ Woithum changna ahong kirnok a, amaning anmanideng aleiti, <<Nangni atun kutung ninlajal a pong ninla minchum mi? Ahun je! Apha kha ahong je! Enru, Miring Sapa kha setna kanei ngai kutchunga akinpe je.

⁴² Thei ru, eini se rang ri. Enru, anakape suok sikpa kha hin-na a-om je!>>

*Jesu ansur
(Mat 26:47-56; Lk 22:47-53; Jn 18:3-12)*

⁴³ Jesu ning kha-ang chong arillai, thiemroi somle-inni ngai karra Judas kha ahongtung je. Ama le kinroi-a mipui ngai, Dan Oja ngai, upa ngai chemjamle luchei anchoi a thiempu kolok ngaining anhong tir je.

⁴⁴ Akape suokpa kxaning mipui ngai kha anjet nasik inkit inkhat aleipe: <<Keining komojop sikpa kha ninmanom pa kha e. Sur ru khan khal inlang keiso ru.>>

⁴⁵ Judas ahei tunglimli, Jesu deng ase-a, <<Oja!>> atia awamojop.

⁴⁶ Khan anmani ning Jesu kha ansurra khan ankhit tit je.

⁴⁷ Tak amadonna akingir mi inkhat ning achemjam aheikalek a, Thiempu chungnung asokpa kuor atuk chet pe je.

⁴⁸ Khan Jesu ning anmanideng aleiti, <<Muruk malet kusur sik anga chemjam le luche kinroi-a kei kusur sik ninhong mi?>>

⁴⁹ Aniso nangni le ni-ombunga Bek-inna kinminchu jet, kei nalei sur muk chu. Tak Chongkintheng khachu pui alatung nger sik e.>>

⁵⁰ Khan thiemroi rikip ngaining anmathaanli antan del je.

⁵¹ Pon kinnem bei kisil rother inkhat ning Jesu nuk aleijui. Anmani ning amakha sur sik a anleitho,

⁵² tak aponsil kha aleida li aroksai-a aleitaan.

Jesu upa rup ngai maikunga anleiroi (Mat 26:57-68; Lk 22:54,55,63-71; Jn 18:13,14,19-24)

⁵³ Khan anmani ning Jesu kha Thiempu Chungnung inna anroi je; khana khan thiempu kolok ngai seng le upa ngai khan Dan oja ngai le anlei kintup.

⁵⁴ Peter ning alek kin-karra ahei jui, Thiempu Chungnung tollai sung a aheilut. Khanna khan raalmi ngaile anlei kin onga mei anlei otbung.

⁵⁵ Thiempu kolok ngai le ankintup upa ngai seng ning Jesu that theina sik ajar anlei entok, tak inkhat te num leimumuk.

⁵⁶ Jesu thothelna wartheng sakhi katamtak anril, tak ansakhi pe ngaikha ite leikin angmak.

⁵⁷ Khan mi alek anhei ngir a Jesu thothelna hiwa wartheng sakhi hi anlei pe:

⁵⁸ <<Keinining ama atikha kinjet, <Miring ning ansak hiwa bek-inn hi keining kithet sik, khan ni thum so-a miring ning ansak mak inkhat keining kasak sik.> >>

⁵⁹ Kha achang inum anmani ngai sakhi pe kha leikin angmuk.

⁶⁰ Thiempu Chungnung khaning anmani rikip maikunga angir a Jesu deng chong aleirakal, <<Anmani ning nang chungna thothelna anril hi masang lei sik mo ni-e?>>

⁶¹ Takkha Jesu ning a-omchena chong inkhat lei rilmak. Ret Thiempu chungnung ning Jesu deng arakal nok, <<Nang hi ralwan katha Pathien Sapa Messiah kha mo ni-e?>>

⁶² Jesu ning aleimasang, <<Kei ki-e, khana Miring Sapa kha akarat tak changteng akin-onga khana marwan sumphai le kinroi-a ahong chum kha ninkholo a ninmu rip sik e.>>

⁶³ Thiempu chungnung khaning apon akeitherra aleiti, <<Eini ning sakhi alop rangai mak je!

⁶⁴ Pathien arildek hi nangni ning ninjet je. Angmo ninmindon e?>>

Ankholo ning amanom muk jei: anminthel a khan amakha nithat sik e anti.

⁶⁵ Alek ning Jesu kha anleimichil thon anleiphut, khan anmani ning amakha amit ankhitpe a anleisuk. <<Najetmi atuning mo anasuk e!>> anmani ning anleiti. Khan raalmi ngaining anleiroi a amakha anleikaben.

Peter ning Jesu jetmong ati (Mat 26:69-75; Lk 22:56-62; Jn 18:15-18,25-27)

⁶⁶ Peter kha tollai a aleiom lai, Thiempu chungnung sok numeisa karra inkhat akolla aheiwa.

⁶⁷ Soknu khaning Peter mei a-ot kha amu-a, alei en nganga aleiti, <<Nang num, Nazareth Jesu le ninlei kin roi.>>

⁶⁸ Takkha Peter ning alei kinthing phirra aleimasang, <<Angkhami nangning niti kei jetmang,>> khan amaning inkhar tolteng aleise. Khawa laitak khan arkhong kha ahong kinram je.†

⁶⁹ Soknu khaning ama amu nok-a amodon na akingir ngaideng khan arilnok, <<Hiwa mipa hi anmani karra inkhat e!>> ati.

⁷⁰ Takkha Peter akinthing phir nok je.

14:49 Lk 19:47; 21:37 **14:58** Jn 2:19 **14:62** Dn 7:13
Khawa laitak khan arkhong kha ahong kinram je.

14:64 Thm 24:16 † **14:68** Manuscripts alak a ommak,

Tomlak soa akolla akingir ngai ning Peter deng aleiti, <<Soilei-a nang anmani karra inkhat ni-e, ajarchu nang Galilee ria ni-e.>>

⁷¹ Khan Peter ning aleiti, <<Kei akidik kiril e, kikin hakser hi-e! Akidik kiril mak inchu Pathien ning nakarak rase! Keining ninril mipa hi jetmang!>>

⁷² Khawa laitak khan arkhong ning woini changna ahong kin ram je, khawa pha Peter deng Jesu ning aleiti, <<Arkhong woini ahong kinram mak lai nangning kei woithum rak jetmang niti sik.>> aleiti kha amindon jei. Khanna ama amulung kintok tak a aleichap.

15

Jesu Pilate maikung anheiroi
(Mat 27:1,2,11-14; Lk 23:1-5; Jn 18:28-38)

¹ Jingteng ma a thiempu kolok ngaining upa ngai, Dan Oja ngai, khan upa rupngai ankhola a kinrangtak a ankintup a khan chong anleimintuk. Anmani ning Jesu kha thirruai a ankhit a anleiroi, khan Pilate kutchunga anleipe.

² Pilate ning chong aleirakal, <<Nang Jehudi ngai Reng mo ni-e?>>

Jesu ning aleimasang, <<Nangning niti kha e je.>>

³ Thiempu kolok ngaining Jesu kha akikhella anleirilset,

⁴ khawa jarra Pilate ning Jesu deng aleirakal nok, <<Nang namasanglei sik mo ni-e? Rangairo anmani rikip ning nuchunga anirilset hi!>>

⁵ Jesu ning chongbai khat num leimasang nokmak, khawa jarra Pilate ning aleingak.

Jesu thatnasik chongtan
(Mat 27:15-26; Lk 23:13-25; Jn 18:39-19:16)

⁶ Rakan Reikahoi anthoracham ansurra anda ngai karra mipui anmanomna miring inkhat kha Pilate ning aleimoso pe chak.

⁷ Khawa lai khan Barabbas anti raalruk ngaile mikathat miring inkhat mikhumna a anlei om.

⁸ Mipui ngai kha anhong kintup a aleitho ang a athonoknasik Pilate deng anhongti,

⁹ Pilate ning anmanideng aleirakal, <<Jehudi ngai Rengpa kha kunumoso pe sik nin monom mi?>>

¹⁰ Thiempu kolok ngaining Jesu chungang thangse annei jarra akut chungang anhei pesuok e ti kha Pilate ning aleijet.

¹¹ Takkha thiempu kolok ngaining mipui ngai kha anleimathok a, Barabbas pot kha moso nasik a anlei minti.

¹² Pilate ning mipui deng aleirilnok, <<khachu nangni ning Jehudi ngai Reng tia ninkoi padeng kei angmo ninimintho nom?>>

¹³ Anmani ning anhei ong malet a, <<Cross a makhai ro!>> anti.

¹⁴ Takkha Pilate ning aleirakal, <<Angsik jarra, amaning ang thothel namo anei e?>>

Anmani ning akikhella an-onga anleiti, <<Cross a makhai ro!>>

¹⁵ Pilate ning mipui mulungkha aleimintai nom jarra Barabbas kha anmani sik a aleimoso pe jei. Khan Jesu kha anrachak a cross a makhai sik a aleipe jei.

Raalmi ngaining Jesu anmunuiso
(Mat 27:27-31; Jn 19:2,3)

¹⁶ Raalmi ngaining Jesu kha Ramkoron pa inn tollai sunga ankei minlut a khan raalmi rikip anlei kinkoichun.

¹⁷ Anmani ning pon sendup akinchuol kha Jesu anleiminsil, liling ria anbol lukhu, kha alu chungang anleiminkhu.

¹⁸ Khan anmani ngaining <<Jehudi Rengpa niringsei sot rase!>> tia chibei anleitho.

¹⁹ Anmani ngaining Jesu lukha luchei ning anleirachak, anleimichilthon, khan ankemorkhup anthep a ankinkun a anleikumuk.

²⁰ Anmani ning anmunuipui soli, pon sendup akinchuol kha anlik pe a, khan ama pon kha anminsil malet je. Khan cross a makhai thatsik a ankei so je.

Jesu cross a anmakhai
(Mat 27:32-44; Lk 23:26-43; Jn 19:17-27)

21 Lampui-a anmani ning mi inkhat ariming Simon anti aram ria khopui a akahong anlei kintonga, khan raalmi ngaining amakha namrop a Jesu cross kha anlei mindom. Simon kha Cyrene mi e khana Alexander le Rufus ngai pa e.

22 Anmani ning Jesu kha Golgotha, hiwa tina chu <<Lusai mun>> antina khan anroi je.

23 Khana khan theiburju le lei anminchun kha myrrh anti kha min innasik anleitho, tak Jesu khawa kha lei in mak.

24 Khan Jesu kha cross a anmakhai a ama ponder kha anmani ning anleikinsem, atu ningmo pon kinlek kha anpha sik tia machal anlei-en.

25 Cross a anmakhai kha jingteng pung ko a-e.

26 Ama cross chung a engset chonga hi-anghin anleitar: <<JEHUDI NGAI RENGPA.>>

27 Ama le kinroi-a muruk inni, inkhat achanteng, inkhat awoiteng cross a anmakhai del.*

29 Mi akase akahong ngaining anlu ankalek a chong ero a Jesu deng anleiril: <<O-a! Bek-inn nithet li nithum sunga kasak sik niti khale!

30 Atun cross chung ria hong chum inlang, nibinga kinhuk rang ro!>>

31 Khawa angkhan thiempu kolok ngai le Dan oja ngai ning Jesu anmunui so-a, inkhat le inkhat ankinbek a, <<Amaning milak chu ahuk a, abinga chu kinhuk tor mak!

32 Messiah Israel ngai Rengpa, cross chung ria atun hongchum ro, khan nahongchum kha kinmuli keini ning nataksen kinte!>>

Khan cross a ama le anmakhai bung inni ngai khaning num ama anlei ril set.

Jesu thina

(*Mat 27:45-56; Lk 23:44-49; Jn 19:28-30*)

33 Sunchimma ram pumpui akijing ning aleimukhu, khawakha pung inthum kutung kha-angkhan aleiti je.

34 Pung inthum a Jesu rasa kinlaktak a-onga, <<Eloi, Eloi, lema sabachthani?>> ati, hiwa tina chu, <<Ka Pathien, ka Pathien angsikmo kei nana dadoi e?>>

35 Khana akaom mi alek ngaining anjet a anti, <<Rangai ru, amaning Elijah akoi hi!>>

36 Ankarra mi inkhat ataanna ponlom kha theiburju kuthur kha amiche-a luchei inkhat mor a akithil a, khana ria Jesu ner katung amajop nasik apeli aleiti, <<Ngaakdiri! Elijah ahonga ama cross ria akadom mata sik mi, enri!>>

37 Khana rasa kinringa a-onga Jesu kha athi jei.

38 Bek-inna andong pon kha achung ria athoi kutung aher inni a akin ther je.

39 Khawa mun a cross mudon akingir raalmi lamkakei inkhat ning Jesu thidan kha aleimu.† Amaning aleiti, <<Akidiktak a hiwa mipa hi Pathien Sapa e!>>

40 Akalakdet ria alei ka-en numei alek anlei om. Ankarra khan Mary Magdalene, anaipa James le Joseph annu Mary, khana Salome ngai an e.

41 Anmani ning Jesu kha Galilee a aomlai anleijui khan anleisen. Khawa munna khan Jerusalem a ama le anhei kinroi numei katamtak num anlei om.

Jesu thaanna anre

(*Mat 27:57-61; Lk 23:50-56; Jn 19:38-42*)

42-43 Arimathea a Joseph ahong tung kha kholei teng a-e je. Amakha Pathien Rengram ahongtung sik alei kangaak, kaja ka-om upa rup karra inkhat e. Khawa kini kha kinrinni e (ti chu, Jehudi ngai Serni kini makma) khana Joseph ning kin-ngam tak a Pilate maikunga awase-a amadeng Jesu kulong kha aleini.

44 Pilate ning Jesu athi jei ti aleijet phakkan aleingak. Raalmi lamkakeipa kha akoi-a Jesu thina asot mije tia alei rakal.

45 Raalmi lamkakeipa chong ajet so-a, Pilate ning Joseph deng Jesu kulong kha naleithei sik aleitipe.

15:24 Laa 22:18 * 15:27 Manuscripts alak achu alam 28 akinchal: *Raal rup ngai khale aleikinchnun bunga Pathien chong akintheng kha pui amintung* (Lk 22:37 enro) 15:27 Is 53:12 15:29 Laa 22:7; 109:25; Mk 14:58; Jn 2:19 15:34 Laa 22:1 15:36 Laa 69:21 15:38 Hon 26:31-33 † 15:39 *thidan*; alak manuscript a-om, *rasa kinlaktak a a-onga khan athi je.* 15:40 Lk 8:2,3

⁴⁶ Joseph ning ruipon kinnem neng arocho-a, akulong kha akadamthak a pon khang lung kolok inkhat aminlet a thaan inkhar suokna kha aleikhar.

⁴⁷ Mary Magdalene le Joseph nu Mary ning Jesu kulong anrena kha anleimu je.

16

Thei nokna

(Mat 28:1-8; Lk 24:1-12; Jn 20:1-10)

¹ Jehudi Serni kini ator so-a, Mary Magdalene le James nu Mary khan Salome ngai Jesu kulong kunot nasik arim kahoi anlei rocho.

² Maapning jingteng matak a, kini ahong suokpha anmani thaang teng anlei se.

³⁻⁴ Anmani lampui tonna ansena inkhat le inkhat ankin bek a, <<Thaankhar lungkha atuningmo ana iltot pesik?>> (Khawa kha lung kolok inkhat e.) Khan anmani ning an-inna lungkha alei kinlet kha anleimu.

⁵ Khan anmani ning thaang sunga alut a, pon kinchoul kabang kachek kinsil khangdong inkhat changteng panga akin-ong anleimu, khan anmani ning anlei kinlai.

⁶ <<Kinlai muru,>> amaning aleiti. <<Nangni ning Nazareth Jesu cross a anmakhai kha nin entok keining kajet. Ama athei a, hin om-mak je! Enru, amaning ajalna kha hi e.

⁷ Atuntak se inlang hiwa chongkahoi hi ama thiemroi ngai le Peter deng warilru: <Ama Galilee teng ninma a aleise je; nang nideng aleiril anga khawa mun a ninwamu sik.> >>

⁸ Anmani ansuok a thaang ria aheitaan je, anchi le anratha kinnok ning asip je. Anmani anchi hei-a atukhat deng inkhatte ril muk je.

Jesu Mary Magdalene deng akinlar

(Mat 28:1-8; Lk 24:1-12; Jn 20:1-10)

[
⁹ Jesu thina ria atheinok nuktenga, maapning kini matak a Mary Magdalene,

asung ria khori sari aholsuok penu deng masatak akinlar.

¹⁰ Khawanu ning ase-a alei kinroipui asap ngaideng aleiril. Anmani anmulung leihoimak a anlei chap;

¹¹ khana numeinu khang Jesu aring amu-a arilpe ngaikha anjet inum anmani ning leitaksen muk.

Jesu ning anak kujui inni deng akinlar

(Lk 24:13-35)

¹² Khan, Jesu ning ankarra miring inni deng ankho sena lampui a anselai alop det a alei kinlar.

¹³ Anmani ning anhei kirra mi alak deng anwaril pe, takkha anmani ning lei taksen muk.

Jesu some inkhat ngai deng akinlar

(Mat 28:16-20; Lk 24:36-49; Jn 20:19-23; Sin 1:6-8)

¹⁴ Nuktenga, Jesu thiemroi some inkhat ngai bu anbak lai alei kinlar. Anmanideng aleiren, ajarchu anmani taksenna neimuk khan anmulung anger rangra, ama aring je tia akumu ngai chong kha taksen tor muk.

¹⁵ Jesu ning anmanideng aleiti, <<Simleichung pumpui a se inlang khang chongkahoi hi miring rikip deng warilru.

¹⁶ Tu achang inum ataksen a baptized akatho mi kha hukminring achen sik; tu achang inum akataksen mak mi kha misetna achen sik.

¹⁷ Akataksen ngai kha hiwa sin kinlak thotor na ranak akinpe sik; anmani ning kei riming a khori ngai holsuok torna anpei sik; anmani ning anjetngaimak chonglop anchong sik;

¹⁸ murul ngai ansura a-imakli tur an-in inum ite tinonung; mi akana ngai chungga ankut anda sik khana akana ngai kha andam sik.>>

Jesu marwan akal

(Lk 24:50-53; Sin 1:9-11)

¹⁹ Puma Jesu ning anmanideng chong aril so pha, amakha marwan chungteng anroi a khang Pathien akut changteng akin-ong je.

²⁰ Thiemroi ngai ning anse a amun rikip a chongkahoi anwaril, khang Puma

ning anmani ngai kha akinroipui chak,
khan antho sin kinlak ngai khaning
anmani chongril kha adik tia amalar pe
jei.]

Alop amuro atorna*

(16:9-10)

²¹ [Numeinu kha Peter le asap

ngaideng ase a anmanideng aleikinti
seng kha akabei a awamin jet.

²² Khan, kumleiko hukminringna
akintheng le akiring chak chongpui kha
Jesu khet ning ama thiemroi ngaikha,
niso teng ria taitak teng kutung aleimoso
jei.]

* **16:20** Manuscripts alak a le amuro chongmalet a hiwa akabong torna Gosple achu akasei a antor (alam 9-20).